

4

PHILOSOPHIA  
DE  
CAVSSIS  
IN COMMUNI;  
ET IN SPECIE,  
QVAM

IN CELEBERRIMA, CÆSAREO-  
*Austriaca Vniversitate Friburgensi*

*Brisgoica*  
PRÆSIDE

P. ANDREA FEVR-  
STAIN SOC. IESV, PHI-  
SOPHIÆ PROFESSORE  
ORDINARIO.

*Publicè propugnabit*

Ornatissimus & doctissimus D.  
IOAN. ANDREAS SPECKHNER  
Friburgensis Brisgoius, AA. LL. &  
Philosophiæ Baccalaureus, Metaphy-  
sicæ ac Matheseos Studiosus.

*Anno M. D C. L X X V. Mense Iulio*

---

FRIBV RGI BRISGOIÆ  
Excudebat Io, Iacobus V Vehrlin.







REVERENDISSIMO,  
ET AMPLISSIMO PRAE.  
SVLI, AC DOMINO  
DOMINO

ROMANO

CELEBERRIMI, AC  
PERANTIQUI MONASTE-  
RII AD S. TRVDPERTVM IN  
HERCYNIA SILVA ORDINIS  
S. BENEDICTI

ABBATI

VIGILANTISSIMO, MERI-  
TISSIMO &c. DOMINO ET  
PATRONO MEO GRA-  
TIOSISSIMO.



*Rima semper in arenam philo-  
sophicam descendendum solli-  
citus fuit, Praesul Reveren-  
dissime & Amplissime, de*

(\*) 2

*benig-*



## DEDICATIO:

benigno Theſibus ſuis patrocinio provide-  
re. Idem ego hodie praſtiturus, cum a-  
quali in articulo conſtitutus oculos meos  
ſtudioſius emitterem, ultra ſeſe eiſdem  
Amplitudo Tua, munificentia ſua ſplen-  
dore, ita liberaliter inſudit, ut pleno in  
meridie, apertis etiam oculis cecutire,  
merito judicaret ſi de auſpiciis certami-  
ni meo comparandis amplius haſitare.  
Quod libellus iſte Hercyniam uſque ad  
ſilvam perveniat, morem ille ceterorum  
ex Alſatia & Briſgoia fugam molientium  
imitatur; cauſas fugæ ſuæ, & quaternas  
quidem, prima ſtatim in fronte cuique  
manifeſtat: belli ſcilicet infelicem aleam,  
ſœcundam ærumnarum effectricem, &  
eruentam omnis calamitatis parentem,  
quæ, cum finem ſuum ( quietam Pacis O-  
livam ) ad hodierna uſque tempora nun-  
quam ſic conſecuta, univerſam longè la-  
tèque adjacentem ſibi materiam, miſerri-  
mâ planè ruinæ formâ turpiſſimè infor-  
mat



## DEDICATIO.

mai' & deformat. Quod verò Disputa-  
tio mea Canobium quoque Tuum ingre-  
diatur, repulsam non veretur; novit e-  
nim literas tecum omnes magnificè habi-  
bitare, & omnes admitti conspexit, qui eo  
nomine accedunt, ut eruditum ostium  
Tuum pulsent. Quare autem ad Re-  
verendissimam Amplitudinem Tu-  
am Philosophia mea, sive rationalis sci-  
entia aditum præsumat, splendorem illa  
à Sapientia Tua (quæ Te virtuti & do-  
ctrinæ maritata ad Abbatiæ fastigium ex-  
tulit) tanquam à causa longè illustrissi-  
ma non vulgarem expectat. Suscipe  
igitur, Præsul Vigilantissime, clientis  
tui ignobilem licet partum, eâ largæ vo-  
luntatis Tuæ beneficentiâ, quâ parentes  
meos & me munificentissimè semper com-  
plexus es, intueri illas eâ magnifici vul-  
tûs Tui liberalitate, quâ universos cir-  
cum circa, ad decimum jam annum Ab-  
bas, tutelæ Tuæ subiectos gratiosissimè  
(\*) 3 suspexi-



## DEDICATIO.

*suspexisti. Annue illis, tanquam grati  
animi signis. Ego pro gratia ista Am-  
plitudinem Tuam meis parentibus &  
mibi cupio immortalem.*

**Reverendissimæ & Am-  
plissimæ Dominationis  
Tuæ**

**Devotissimus Cliens &  
Servus**

**Ioan. Andreas Speckhner.**



APPROBATIO  
THEOLOGICA.

**T**Heses istæ Philo-  
phicæ de Causis do-  
ctrinam solidam conti-  
nent, & fidei ac bonis  
moribus per omnia con-  
sonant: proinde dignæ  
sunt, ut in concertatio-  
nem, & lucē publicam  
prodeant.

*Ita censeo*

Iac. Christophorus Helbling  
SS. Theol. Doct. & Professor  
ord. nunciusd. Facul. Decanus.

APPRO-



APPROBATIO  
PHILOSOPHICA.

**D**isputatio hæc Philo-  
sophica universas de  
Causis difficultates per-  
tractat, propositasque  
quæstiones perspicuâ  
claritate eruditè ac soli-  
dè dissolvit; lucem pro-  
inde & arenam publi-  
cam jure meritisimo si-  
bi vindicat.

*Ita censeo*

Iodocus Knab Soc. IESV  
Phil. Profess. ordinarius, &  
eiusd. Facultatis nunc De-  
canus.





# DE CAUSA IN COMMUNI.

*§. 1. Quid & quomplex sit causa  
in communi?*



Ico 1. Causa latè sumpta est principium entis limitati. Sic in re omnes, his duobus requisitis cōtenti, 1. ut causa sit principium, hoc est, ut determinet vel conducat ad existentiam alicuius; sic omnia, quæ se tenent ex parte actûs 1. cū sint priores natura, causæ nuncupari possunt, v. g. causæ morales, dispositiones, conditiones &c. 2. ut illud, quod producitur, sit ens defectibile vel indifferens ad existendum. Sic Deus Pater nō est causa sui Filij Divini, juxta symb. S. Athanasij, geniti non facti; nam factum, causatum vel creatum esse, dicit aliquam imperfectionem, ut bene adverterunt Patres Latini.

Causa verò physica vel strictiùs sumpta  
est,



est, quæ ex virtute intrinseca producit ens limitatum, hoc est, quæ est principium vel realiter & immediatè productivum, ut causa efficiens & materialis extrinseca; vel constitutivum, ut materialis intrinseca, & formalis; vel ultimatè motivum ad sui productionem, ut finalis.

Dico 2. licet variæ dentur causæ ex triplici capite ortæ. 1. ex diversa entitate causæ: sic datur causa 1. nempe Deus, & secunda sive creatura. 2. ex diversitate vel copia effectûs; sic datur causa univoca, h. e. si effectus sit ejusdem rationis cum causa, & æquivoca, si diversæ. Universalis & particularis: prior plurimos & diversos producit effectus, ut Deus, Sol: posterior paucos respectivè. 3. ex diversitate influxûs: sic datur causa libera, necessaria; adæquata, inadæquata; physica, moralis; remota, proxima; intrinseca, extrinseca &c. Licet inquam dentur variæ causæ, Aristoteles tamen causam divisit in 4. genera: nempe in causam propter quid, ut est finalis; à quo, ut efficiens; ex quo, ut materialis, & per quid, ut formalis. Rationem dat Philosophus, quia sicut prædictis 4. modis omnis causa inquiritur, sic per eosdem responderi solet, ergo divisio Philosophi mala non est; præsertim cum omnes reliquæ causæ ad hæc 4. genera reducantur, v. g. dispositiones, conditiones, &c.

Ob.



Obijcies 1. Iuxta allatam definitionem Deus Pater videtur esse causa Filij; quia Filius est ens essentialiter ab alio; non enim habet prædicatum Aseitatis: ergo non habet omnem perfectionem, adeoque est ens limitatum. R. licet Filius sub ratione filiationis essentialiter sit ens ab alio nempe à Patre Divino; Filius tamen, quia realiter est ipse Deus, & sub ratione Deitatis est ens à se existens, & infinitæ perfectionis: ideo Pater Divinus non potest dici causa Filii, realiter infiniti.

Obijcies. 2. cognitio vel volitio Divina circa contingentia est indifferens ad existendum: ergo est limitata: ergo Deus est causa suæ cognitionis & volitionis circa contingentia vel libera versantis. R. cognitionem vel volitionem Dei circa contingentia (si Deo sit adæquatè intrinseca) esse realiter ipsum Deum, & consequenter quoad prædicatum absolutum esse necessarium, licet quoad esse relativum sit contingens. Et hoc in certo sensu tam parum videri debet paradoxum, quàm eandem cognitionem creatam esse posse claram & obscuram, sive actum scientiæ, fidei vel opinionis: quidquid sit de difficultate cognitionis & volitionis divinæ, viderint Theologi, semper cum catholica fide defensuri in re virtualiter distincta sive



in Deo verificari posse prædicata de se contradiçtoria v. g. generari & nō generari, spirari & non spirari, ergo poterit eadem cognitio dici contingens & non contingens.

*§. 2. Quid sit virtus causæ, & an Causa in actu 1. constituatur per possibilitatem actionis?*

**D**ico 1. Virtus causæ est ipsa aptitudo, vel potentia ~~quæ~~ cujuscunq; rei, potentis producere effectum limitatum; quæ potentia realiter identificatur cum entitate causæ. Prob. 1. quia illud est vis vel virtus causæ, quod est ipsum posse causare, sed posse causare est ipsa entitas causæ (ut probari posset inductione) ergo entitas causæ est virtus causæ. 2. quia causa per hoc differt à conditione, quòd causa habeat virtutem, meritum vel bonitatem propriam, secum identificatam: conditio verò habeat alienam, ergo. 3. quia sicut potentia materiæ, qua recipit formas, realiter non distinguitur ab ipsa materia, sic potentia vel virtus causæ aliquid producendi non debet realiter distingui ab ipsa entitate causæ; prius est verum, ergo &c. Si causa vel virtus causandi omnibus ad agendum requisitis instructa sit.

Voca;



vocatur causa completa, vel in actu primo proximo sive completo; sin minus, dicitur incompleta vel in actu 1. remoto.

Dico 2. Causa in actu 1. non constituitur per possibilitatem actionis. Prob. 1. quia causa in actu 2. physico constituitur per actionem sive causalitatem: ergo causa in actu 1. physico (cùm juxta omnes sint duo realiter diversa tota) per illam formaliter constitui non potest; præsertim si inter rem possibilem & existentem nulla detur realis distinctio. 2. quia causa in actu 1. etiam completo plus non dicit quàm posse causare: sed posse causare est ipsa aptitudo vel potentia causæ realiter indistincta ab entitate causæ; ergo causa in actu 1. formaliter non constituitur per actionem possibilem, aliàs omnipotentia Dei formaliter constitueretur potens per creaturas sive actiones posibles à Deo (ut hîc supponere licet) realiter distinctas. 3. quia sicut visio formaliter non constituitur per murum, aut potentia visiva per ipsam visionem; sed per respectum essentialem ad murum: sic causa in actu 1. vel potentia causæ non constituitur per ipsam actionem, sed per respectum ad illam: prius concedunt Advers. ergo. Confirmatur: quia si possibilitas actionis esset pars actûs 1, tunc etiam possibilitas



effectûs esset pars, quod admitti non solet. licet enim cognitio possibilitatis effectûs possit esse pars actûs 1. non tamen ipsa possibilitas effectûs est pars: ergo.

Obi. 1. Res in actu 1. & 2. includit easdem partes; equus enim in actu 1. sive possibilis, & equus in actu 2. hoc est, existens includit easdem partes nempe animal hinnibile: ergo causa in actu primo includit actionem possibilem, quia causa in actu 2. includit actionem actualem. R. disting. antecedens: res in actu 1. & 2. logico includit easdem partes essentielles, cōcedo; in physico, nego antec. & conseq.

Obi. 2. causa in actu 1. constituitur per causalitatem in actu 1. sicut causa in actu 2. per causalitatem in actu 2. hoc est actionem actualem: sed causalitas in actu 1. est actio possibilis, sicut causalitas in actu 2. est actualis actio: ergo causalitas in actu 1. constituitur per actionem possibilem. R. causa est quidem terminus concretus in recto dicens ipsam entitatem causæ, in obliquo verò causalitatem, quæ tamen in actu 1. nil est aliud quàm ipsa aptitudo causandi, adeóq; concessa majore, nego vel disting. min. causalitas causæ in actu 2. logico hoc est, physicè existentis & in actu primò physico, h. e. causæ tantum potentis producere effectum  
est



est actio possibilis, nego. Causalitas causæ in actu 1. logico existentis considerata tamen quod actum 2. physicum, siue quoad illius prædicata essentialia est actio possibilis concedo min. & sic distincto consequente nego consequentiam.

Ob. 3. cum quodā docto Recent: vel possibilitas actionis constituit actum primū, vel impossibilitas actionis constituit actum 1. sed impossibilitas actionis nō constituit actum 1. ergo impossibilitas constituit, quia ex contradictoriis alterutrum debet esse verum. R. licet possibilitas & nō possibilitas actionis in se quoad naturā & existentiam sint æquē contradictoria, quā effectus & negatio illius; nulla tamen est contradictio quoad constitutionem actūs 1. quia utraque propositio majoris est affirmativa, & est de subiecto non supponente. Vel si iste modus argumentandi valeret, tunc omnis res vel negatio illius constitueret actum 1. cujuscunq; causæ.

### §. 3. De existentia & causalitate Causæ.

**D**ico 1. Causa in eo instanti, quo physice influit, debet actu existere. Prob. 1. quia nulla res potest dare, quod non habet: ergo causa physice vel realiter aliquid produciens debet realiter existere; aliās daret



ret alteri existentiam cum tamen ipsa nulla haberet. 2. quia si res immediatè antea existens v. g. si prima verba aut forma baptismi, posset physicè influere in gratiam producendam, non esset ratio, cur non aliquid jam pridem annihilatum posset esse causa physica, u. g. Bucephalus Alexandri M. posset hodie hinnire : canis mortuus posset latrare : sed hoc videtur ex terminis absurdum : sequela probatur : quia nempe productionis unum tam parum habet suum esse quàm alterum, ergo. 3. quia ubi nulla est virtus productiva, ibi non potest dari productio : sed in eo instanti, quo causa non est, nulla est virtus productiva; causa enim & virtus productiva identificantur : ergo.

Dico 2. Causalitas causæ est ipsa actuale exercitium vel forma, per quam causa constituitur actu causans ; sive est formalis influxus aut determinatio, vi cuius hic numero effectus dependet & connectitur determinatè cum hac numero causa. Sic sentiunt omnes, & est quæstio de impositione & usu nominis. ergo. Hæc forma vel causalitas est varia pro ratione causarum : quoad causas intrinsecas assignatur unio : quoad extrinsecas, si sint strictè physice, actio suas causas essentialiter respiciens : si morales tantùm sint, illarum



rum causalitas est quædam motio moralis, de quibus infra.

Obi. 1. Causa moralis & finalis quando actu causant, non debent actu existere: ergo idem dici potest de causa physicè influente. R. concedo anteced. nego consequ. & paritatem: quia causa moralis & finalis existunt intentionaliter & causant mediante cognitione per aliam causam physicam existentem: sed hoc dici non potest de causa physica, nullam aliam causam physicam supponente.

Obi. 2. unum corpus non debet esse in eodem loco cum illo, in quod agit, sed sufficit contiguitas: ergo etiam sufficit contiguitas temporis. R. concessio anteced. nego consequent: quia impossibile est, ut aliquid realiter agat, quod realiter nihil est; aliàs ageret & non ageret: ageret ut supponitur; & non ageret, quia quod non est, hoc non est: ergo hoc non est agens, quia prius est rem esse, quàm operari. Quòd autè res existat vel agat in uno vel plurib<sup>9</sup> locis, nulla sequitur contradictio: ergo.

Ob. 3. sicut aliquid, quod antè fuit, moritur vel potest mori; sic aliquid, quod antè fuit, potest agere: ergo. R. nego sequelam vel paritatem; quia Tò mori est non vivere & non agere: sed ad hoc nulla requiritur virtus aut existentia: ergo.



*§. 4. De discrimine inter causam  
physicam & moralem; inter mo-  
ralem & conditionem.*

**D**ico 1. Causa propriissimè physica sive extrinseca nempe efficiens & materialis sustentativa est principium, quòd ab actione entis limitati sub prædicato actionis immediatè, determinatè & indispensabiliter respicitur ut aliunde existens: bonitas conclusionis habetur ex eo, quia sic omnia, quæ non sunt causæ physicæ excluduntur, & 1. quidem per actionem entis limitati excluditur Deus Pater respectu Filii divini. 2. per Tò sub prædicato actionis, productionis vel effectiōis excluduntur actus intentionales v.g. cognitiones & volitiones sub alio prædicato v.g. repræsentationis sua objecta & causas morales essentialiter respicientes. 3. per Tò determinatè excluditur decretum Dei; licet enim actio, qua talis essentialiter præsupponat vel respiciat decretum Dei, non tamen respicit hoc determinatum. 4. per Tò immediatè excluduntur causæ remotæ. 5. per Tò indispensabiliter excluduntur causæ morales & dispositiones, sine quibus Deo difficile nō foret effectum producere. 6. per Tò aliunde existens excluditur causa finalis, quæ licet ab actione respiceretur essentialiter



tialiter determinatè & immediatè, non tamen aliunde existit. Discrimen itaque causæ physicæ à causa morali in eo consistit, quòd actio realiter non procedat à causa morali, neque illam immediatè determinatè & essentialiter respiciat.

Dico, 2. licet quandoque causa moralis confundatur cum conditionibus, dispositionibus & causa finali; causa tamen moralis magis propriè dicta est illa, quæ aliunde existens ex propria virtute bonitate vel merito movet causam efficientem ad effectum producendum: conditio verò movet ex merito vel virtute aliena hoc est, conditio est tantum applicativa virtutis sicut est approximatio. Ita omnes sentire videntur: Res tota pendet ab institutione vel usu vocis: ergo. Si conditio realiter & actu existat, vocatur conditio physica: Si jam existit, vel si prævidetur, independenter à productione effectus existitura, dicitur conditio moralis.

Ob. 1. omnis actio essentialiter & determinatè respiciens causam, hanc respicit immediate: ergo malè additur particula immediate. R. Nego: quia anima potest esse causa remota & sic moralis respectu specierum impressarum ab actibus intentionalibus productarum: actio verò productiva specierum immediate respicit cognitionem



tanquam suam causam physicam; cognitio verò cum sit realiter ipsa actio, essentialiter & immediatè respicit animam, ergo bene saltem claritatis causâ additur immediatè.

Ob. 2. Conditio ex proprio merito sæpe causam movet, quia occasio, quæ est conditio, facit furem: ergo. R. licet removens impedimentis aliàs furtum prohibentibus furax homo magis incitetur vel moveatur ad iniustam rei alienæ ablationem, non tamen sequitur hinc conditiones hoc est, removens prohibens sive negationes rerum aliàs impediendum habere propriam & realē bonitatem finaliter motivā, ut per se patet. Interim non nego, quòd eadē res, quæ respectu unius causæ est cōditio, respectu alterius possit esse causa moralis, pro diversa tendētia & æstimatione operantis.

*§. 5. Quid & quoruplex sit prioritas, & qualis ad causandum requiratur?*

**D**ico ii prioritas in genere & posterioritas consistit in additione & consecutione unius ad aliud: prius enim est illud, quod alteri non additur, sed ipsi additur aliud; posterius verò est illud, quod alteri additur. Ita Perezius, Maurus & alii. Prob. i. quia ultimū dicitur illud, quod ita addi-



tur alteri, ut ipsi nullū aliud addatur: ergo illud est prius, cui aliud additur, & quod additur est posterius. Probari posset 2. ex variis prioritatibus; quò enim magis creaturæ accedunt ad primum tempus, ad perfectionem, dignitatem, vel existentiam Dei, eò sunt priores tempore, dignitate vel natura.

Dico 2. multiplex dari potest prioritas: datur enim prioritas temporis, ordinis, intentionis, executionis, dignitatis, rationis, illationis & naturæ: prioritas temporis habetur à serie durationum, qua quis propinquior est primæ durationi, vel qua quis durat ante alterum. Ordinis prioritas consistit in collocatione rei quoad locum: sic exordium est prius epilogo, & sedens in capite mensæ est ordine vel loco prior reliquis assidentibus. Dignitatis desumitur ab officio vel perfectione essentiali aut accidē tali: sic sacerdos est prior laico, angelus homine; Sanctus peccatore. Intentione prius est, quod magis intēditur: sic finis est intentione prior suis mediis. Executione, quod prius efficitur, ut mediā respectu finis. Prioritas rationis habetur à nostro cōceptu v. g. inter 2. realiter identificata, quorum unum se habet per modum causæ vel essentiae metaphysicæ, & alterum per modum effectus vel proprietatis metaphy-



metaphysicæ : sic rationale est prius risibile.  
 Si unum inferri possit ex altero, vel si unum  
 sit affirmabile, altero non affirmato, sed  
 non vicissim, tunc inter illa 2. dari dicitur  
 prioritas illationis sive à subsistendi con-  
 sequentia : Sic prædicatum superius v. g.  
 animal est prius prioritate illationis,  
 quàm prædicatum bruti. Prioritas origi-  
 nis propriè loquendo convenit illi tan-  
 tùm, quod est actualis positio alterius :  
 sic actio est prior suo termino : sic De-  
 us Pater dicitur origine prior, quia pater  
 est actualis vel activa generatio Filij.  
 Per prioritatem naturæ nil aliud intelli-  
 gitur, quàm prioritas causalitatis effe-  
 ctum cum causa coniungentis. De qua  
 postea.

Dico 3, licet in omni causa conci-  
 piamus aliquam præcedentiam vel prio-  
 ritatem ; ad essentiam tamen causæ  
 non requiritur prioritas temporis, quia  
 Sol est causa lucis in primo instanti se-  
 cum existentis : non ordinis, quia  
 causa v. g. ignis suprà infrà antè &  
 retrò effectum producere potest : non  
 prioritas dignitatis, ut patet in causa  
 univoca : non prioritas illationis, quia  
 sæpiissime nec effectus ex sua causa, nec  
 causa ex effectu est inferibilis, licet ra-  
 tione



tione actionis determinatæ utrumque inferri possit : non mera prioritas rationis , quia hæc dari solet inter identificate : non prioritas intentionis , non executionis , quia aliàs media v.g. medicina non esset causa finis nempe sanitatis, nec finis esset causa mediorum, quia neutrum habet utramque prioritatem, ergo.

Dico 4. In causis diversis datur & requiritur diversa prioritas ad causandum. In causa finali datur & sufficit prioritas intentionis. quia primò intenditur finis , & ultimò per media à fine causata obtinetur . In causis intrinsecis datur prioritas illationis , quia ex toto licet inferre quamlibet partem , sed non vicissim. In causis extrinsecis jam aliunde suam existentiam habentibus independenter ab actione productiva effectûs , datur prioritas naturæ.

*S. 6. Quid sit prius naturæ , & an aliquid tempore posterius possit esse prius naturæ ?*

**D**ico 1. illud est prius naturæ, quod aliunde existens alterum determinat ad existendum



dum. Sive quod est ex parte actûs 1. proximi, vel quod aliunde existens ab actione limitata respicitur, intellige vel immediate, ut causæ strictè physicae, vel mediate, h. e. mediante decreto Dei, ut causæ morales & conditiones. Sic in re cōmuniter omnes cōveniunt, hæc tria ad prioritatē naturæ requirentes. 1. ut inter causam & effectū detur connexio. sive ut causa juvet ad productionē effectûs 2. ut illud, quod dicitur prius suam existentiam nō habeat à productione effectûs 3. ut productū sit ens limitatū.

Dico 2. aliquid tempore posterius potest esse prius naturā. Probatur 1. quia merita Christi, licet post plurimos SS. Patres sint posita, communiter tamen censentur priora naturā quoad gratias illis datas, ergo. Prob. 2. quia ad prioritatē naturæ non requiritur, ut aliquid actu & physicè existat, quando effectus, producitur; ut patet in actibus meritoriis & artefactis habituum activorum: ubi præmium vel merces dari solet in termino vitæ & artificiosi laboris, utique tunc realiter non ampliùs existentis: ergo aliquid, quod physicè non existit, potest esse prius naturā. Probatur 3. quia prioritas naturæ non dependet à prioritate vel successione temporis, ut fatentur omnes; quia in unico instanti temporis dari possunt plurima instantia



instantia vel signa naturæ sive causalitatis, ut patet in productione radij solaris per unicum instans temporis in longū spatium propagati, aut specierum visualiū : ergo sicut simultas temporis nō tollit prioritatem naturæ, sic non tollet temporis posteritas. 4. quia illud est prius natura, quod aliunde de presenti, præterito vel de futuro existens cōcurrit ad productionē effectūs : sed merita Christi independēter ab Angelis exstitura utique poterant concurrere, & Deum movere ad supernaturalem gratiam tanquam ad præmium anticipatum Angelis dandum, ergo. sic sponsis principibus quandoque oblatae sunt in nuptiis pretiosissimæ cunæ ob prolem independenter à cunarum productione prævisam : ergo. major videtur esse certa ; causa enim finalis tantūmodo ideo non est prior natura, quia movet, ut sit vel acquirat suam existiam dependenter ab effectu ; sed hoc non fit in causa morali : ergo aliquid posterius tempore, & aliunde, hoc est independenter à productione effectūs existēs potest esse prius natura, præsertim eū prioritatem naturæ non consistat in durationibus, sed in causalitate h. e. actione : ergo durationes se habent impertinenter ad prioritatem naturæ.

Ob. 1. Ex Physica effectūs existentia iuxta omnes bene infero existentiam causæ :



sa : ergo posterius tempore non potest esse prius natura. R. disting. anteced. ex effectu infero existentiam causae, si causa sit physice influens, concedo, si moraliter, ut causa finalis vel ut moralis primum aliunde exitura, nego anteced. & consequentiam.

Ob. 2. medium ad finem non potest esse post finem : sed omnis causa est medium ad effectum tanquam ad finem producendum : ergo causa non potest esse post effectum vel finem : ergo posteritas temporis tollit prioritatem naturae. R. disting. maj. si medium sit physicum vel purum medium, concedo : si medium sit morale vel quod non est purum medium, nego maj. & disting. min. omnis causa est medium vel physicum vel morale, conced. semper physicum hoc est physice influens, nego min. & ultimam consequentiam.

Ob. 3. duratio prior tempore in serie & ordine naturali non potest esse posterior natura : ergo nihil tempore posterius potest naturaliter esse prius natura. R. licet duratio vel alia res tempore prior in ordine physico, vel quoad causas irracionales non possit esse posterior naturam ; in serie tamen vel ordine intentionali siue quoad causas racionales facillime & naturaliter potest contingere. An non hyems aliunde exitura nos ad vestes & strues lignorum



gnorum comparandas movere solet?  
ergo.

*§. 7. An aliquid possit seipsum producere*

*& an detur mutua prioritas naturæ?*

**D**ico 1. Nil potest se ipsum per jã actionem producere. Sic communissima. Prob. 1. quia actio productiva effectus respicit causã ut aliunde existentem, ut habetur ex lumine naturæ, & ex omnibus aliis causis, effectum distinctum physicè producentibus: ergo nil potest se ipsum producere. 2. quia sic tolleretur argumentum S S. Patrum cõtra Atheos factum, quo probatur existentia Dei: item Filius Divinus per generationem divinã non amplius probari posset realiter distinctus à Patre. 3. quia sic aliquid esset & non esset seipso prius: esset, quia est causa, & non esset, quia nil potest esse sine se, ergo.

Dico 2. implicat mutua causalitas vel prioritas naturæ pro eodẽ reali instanti temporis quoad primũ esse physicum, tam in eodẽ quàm diverso causarum genere, inter causas realẽ & absolutã existentiam requirentes, ut sunt causæ physice & morales. Sic communissima. Prob. 1. ex ipsa definitione prioritatis naturæ, quæ requirit ut causa independentẽ à suo effectũ habeat suã existentiam. 2. quia si daretur mutua causalitas, tunc aliquid posset se ipsum producere, posset enim producere suam causam:



sam; ergo. adeoq; tolleretur necessitas primæ causæ. 3. quia aliàs idem esset antequàm esset, esset ut causa, & non esset ut effectus. 4. quia sic aliquid posset esse seipso prius, quia quidquid est prius priore se, est etiam prius seipso, sed admissa mutua prioritate, aliquid est prius priore se, nam causa A esset prior effectui, & effectus, quia etiã esset causa, esset prior causa A; ergo causa A esset prior seipsa, quod utiq; est implicatorium.

Hæc tota conclusio licet ex ipso lumine naturæ sit notissima & evidenter certa, sexcentæ tamen contra illam formari possunt obiectiones, non leves, ex variis capitibus ortæ. 1. ex difficultate materiæ ad alias scientias spectantis. 2. ex mala apprehensione causæ finalis pro efficiente, hoc est, si rem dependenter ab effectu existentiam concipimus, quasi aliunde existeret. Hinc sicut paterfamilias per mercedem prius operariis datam intendit laborem tanquam finem, sic Deus per mortem Pauli intendit preces Ecclesiæ. 3. ex confusione actionis 1. & 2. vel temporis, ubi duo putantur esse pro eodem instanti temporis, cum tamen sint pro diversis v. g. si Petrus dicat; movebor ad motum Pauli, Paulus verò dicat, quiescam ad motum Petri, nisi hi 2. ineptire velint, res pro diversis instantibus ita intelligi debet, ut motus Pauli in  
instanti-



instanti A determinet motum Petri in instanti B, & motus Petri in instanti B determinet quietē Pauli in instanti C. Idē contingit in feudatario certo tempore iurisdictionem petente, ubi iurisdictionis est causa petitionis, & petitio est causa iurisdictionis, sed pro diverso tempore. Sic dispositiones causant formam, & ut proprietates causantur ab illa. Sic Rex Ezechias per preces sibi impetravit 15. annos, sic habitus causatus, & causatur ab illis. 4. mutua causalitas obiici solet inter illos effectus, qui habent mutuam dependentiam nec à priori nec à posteriori, sed ex concomitante sive per mutuam concomitantiam, ubi cum sæpe utriusque effectus causa à multis ignoretur, ratio causæ non magis uni adscribi solet, quàm alteri, ut sunt ingressus venti & apertio fenestræ, motus rotarum, carbonum accensorum conservatio, baculorum inclinatio, confictio vel calefactio manuum &c. 5. mutua causalitas obiici solet ex intricatis volitionibus & essentialiter inefficacibus, causatis à cognitione rem impossibilem tanquam possibilem representante; vel quæ tantum denominativè & extrinsecè dicuntur priores à prævis cognitione sui, quarum consideratio multum reflexionis & parum utilitatis habere videtur; ergo relinquenda.



*§. 8. An detur, vel dari possit  
duplex actio vel causa totalis, respe-  
ctu ejusdem effe-  
ctus?*

**D**ico 1. licet causæ in actu 1. existentes naturaliter plures dari possint totales, hoc est, inter plures ignes quilibet est aptus, ut se solo producat hunc numero calorem vel alium ignem, duplex tamen causa totalis in actu 2. naturaliter non datur. Sic communis. Prob. 1. quia si una causa totum faciat, vel si actio productiva effectus ab una tantum causa dependeat, tunc altera nil habet, quod agat; ergo. Vel sic: nulla est necessitas totales actiones ex conventu causarum multiplicandi, una actione totum finem, nempe productionem termini obtinente. 2. quia licet causa prima se sola possit effectum producere, per eandem tamen actionem concurrat cum causa secunda: ergo hoc ipsum facere videntur causæ secundæ; quia vis operativa in præsentia plurium causarum non nihil ligatur concursu attemperato: sic testatur experiëntia pluribus equis aut hominibus minori conatu eundem currum trahentibus: vel si quili-  
bet



bet equus illum , quem solus debet .  
conatum adhibeat , tunc plures multò  
plus vel velociùs operantur : ergo signum  
est naturaliter non dari causas tota-  
les.

Dico 2. divinitus non implicat dari  
plures causas vel actiones totales ad eun-  
dem effectum producendum. Prob. 1.  
quia omnipotentia DEI est infinita , &  
nulla ostendi potest contradictio aut ef-  
ficax ratio in contrarium : ergo. 2. quia  
idem potest supernaturaliter habere plu-  
res ubicationes , ut patet in Sacrosancto  
Corpore Christi per consecratas hòstias  
replicato ; ergo posset hoc ipsum cor-  
pus Christi in pluribus locis positum ,  
semper ibi per specialem actionem pro-  
duci , ut non pauci docent Theologi :  
deinde si plures hostiæ consecratæ pene-  
trarentur , tunc Christus adhuc posset lo-  
cari , per plures ubicationes : ergo  
etiam posset produci per plures actio-  
nes. 3. quia à Deo , cur duas ponat a-  
ctiones totales , est aliquis finis pruden-  
ter intendibilis , v. g. propter multipli-  
cem positionem corporis replicati , pro-  
pter excellentia merita alicujus Sancti ,  
cum quo D E V S semper in præsenti-  
a aliarum causarum concurrere vellet  
per



per actionem totalem. Deinde etiam si nos, præscindendo à fide, nullum sciamus finem prudenter intendibilem, cur accidentia possint divinitus existere sine substantia, an propterea implicat? ergo nostra scientia vel potius ignorantia finis prudenter intendibilis parum probat.

Ob. 1. Implicat ens superfluum: sed duæ actiones totales sunt superflue; quia una obtinet totum finem vel effectum, unde altera tanquam medium ad finem ineptè applicaretur; ergo implicat actiones totales. R. disting. mai. implicat eas ex omni fine tam intrinseco quàm extrinseco superfluum, concedo: ex solo intrinseco fine superfluum, nego. & disting. min. 2. actiones totales sunt superflue ex fine intrinseco vel natura actionis, productionem termini intendentis, concedo: ex fine extrinseco vel ratione causæ producentis, nego min. & consequent. quia licet comestio cibi ex fine intrinseco vel ex sua natura ordinetur ad corpus nutriendum, potuit tamen fieri ex alio fine, Christo post resurrectionem coram Apostolis cibum postulante & comedente; idem dici potest de actione.

Ob. 2. si dari possunt 2. actiones totales, tunc aliquid poterit divinitus seipsum producere quoad secundum esse; quia actio



actio secunda licet ex fine intrinseco sit superflua, poterit tamen utilis esse ex fine extrinseco. R. P. Suarezium & alios sequelam concedere, quia secunda actio haberet novum effectum formalem, quem non prestitisset prima actio, nempe effectum dependentiæ ab hac causa, sive ut effectus dependeat à sua causa secum identificata. Multi negant sequelam: quia videtur esse de conceptu vel essentia omnis actionis, ut sit productiva sui effectûs, adeoque ut proprii signo naturæ dicat negationem alterius actionis, sicut enim causa non datur, ut tantum faciat effectum à se dependere, sed etiam ut reddat existentem; sic actio præter dependentiam debet esse essentialis productio sui termini, vel effectûs.

Ob. 3. non potest eadem actio pendere à pluribus causis totalibus: ergo nec idem effectus; deinde non possunt dari plures causæ totales intrinsecæ; ergo nec extrinsecæ. R. Concesso utroque anteced. nego consequ. & paritatem: quia actio, quæ essentialiter & immediatè pendet à sua causa, non potest mutare suam essentiam. Ad secundum dico, quòd una pars non possit esse totum, & non totum, quod tamen sequeretur, causa enim totalis intrinseca utique esset totum: & tamen non esset totum, quia cum altera parte vel causa totali utri-

B

que



que faceret aliud totum: ergo respectu illius non esset totum: ergo implicat dari causas totales intrinsecas respectu ejusdem compositi, vel effectus.

## DE CAUSIS INTRINSECIS.

De materia, forma & unione jam egimus in aliis Thesis prælo commissis, nunc restant illa, quæ rationem causæ concernunt, hic paucis exponenda.

*§. 1. Quid sit causa intrinseca, quæ virtus & causalitas illius?*

**D**ico 1. Causa intrinseca nil est aliud, quàm pars compositi ut quod, hoc est, quæ per modum extremi mediante unione constituit totum limitatum, sic excluditur SS. Trinitas tribus constans personis tam parum, quàm Pater respectu Filij Divini nomen causæ admittentibus; hæc SS. Trinitas propriè non est compositum, longè minus totum limitatum. 2. excluduntur causæ extrinsecæ, quæ non sunt partes, sed producant effectum à se adæquatè distinctum.

Dico 2. Causa in actu 1. sive virtus causativa



fativa causarum intrinsecarum, est aptitudo aliquod totum componendi. Ratio est, quia posse causare, & habere virtutem causandi sunt idem, sed posse causare est ipsa aptitudo: ergo habere virtutem causandi est ipsa aptitudo.

Dico 3. Causalitas causarum intrinsecarum in actu primo est conjungibilitas vel aptitudo unius partis cum alia ad aliquod totum componendum. Ratio est: quia entitas causæ ab hac aptitudine denominatur causa potens causare; siue in actu primo: ergo aptitudo rectè dicitur esse causalitas in actu primo. Causalitas verò in actu 2. est unio, vel compositio. Prob. 1. quia illud est causalitas, quod est actuale exercitium, vel talis forma causæ, quâ posita partes, hoc est; materia & forma actu & indispensabiliter causant suum effectum, siue totum: sed unio est talis forma, vel exercitium, quo posito partes causant totum: ergo unio est causalitas. Confirmatur: quia duo ad naturam causalitatis requiruntur: 1. ut posita causalitate indispensabiliter ponatur effectus 2. ut effectus dependeat ab hac numero causa: sed hæc 2. requisita habet unio, ut paulò ante vidimus: ergo.

Ob. 1. omnis causalitas & terminus à sua causa debet produci, & causalitas constituit



stituit suam causam priorem natura', respectu effectus: sed unio non debet produci à suis extremis (quia aliunde producta æquè foret causalitas) nec reddit extrema naturâ priora, quia nulla datur actio, aut realis productio partium totum causantium: ergo unio non est causalitas. R. disting. mai. quoad utrumque membrum: omnis causalitas debet produci à sua causa, & illam constituit naturâ priorem, in causis extrinsecis, concedo: in intrinsecis, nego: & concessa minore disting. consequ. unio non est causalitas causarum intrinsecarum, nego: extrinsecarum, concedo.

Ob. 2, partes vel causæ intrinsecæ non possunt dici veræ causæ; vel enim essent ut unitæ, vel non unitæ; non quatenus sunt unitæ, quia ut sic non distinguuntur à toto; nec possunt esse causæ, ut non unitæ, quia ut sic non constituunt totum: ergo partes nullo modo sunt veræ causæ. R. partes vel causæ intrinsecæ sunt quidem causæ ut unitæ, non tamen in sensu colectivo, quasi materia, forma, & unio in recto importatæ, unirentur alicui alteri, sed in sensu distributivo, ita ut materia uniatur formæ & forma materiæ per unionem, quæ sit ratio, vel causalitas in obliquis importata.

§. 2. Quid



*§. 2. Quid, & quotuplex sit causa materialis, & an detur?*

**D**ico 1. Causa materialis in genere, nihil est aliud, quàm subjectum formæ, intellige sustentativum, vel receptivum. Si illa forma recepta, suum subjectum constituat prius naturâ, ut actio eductiva, vocatur causa materialis extrinseca: si subjectum cum illa constituat compositum substantiale, vel accidentale, nuncupatur materialis intrinseca. Itaque.

*Dico 2. Causa materialis est duplex: intrinseca & extrinseca. Intrinseca est pars constitutiva totius, quæ se habet per modum subjecti; subjectum verò communiter dicitur illud, quod ex duobus intimè & immediatè unitis est magis determinabile, indifferens, vel perfectibile; sicut materia prima respectu formarum, substantia respectu accidentis, causa materialis respectu termini educti, ens absolutum respectu sui modi. Causa materialis extrinseca est causa strictè physica, immediatè recipiens productionem entis limitati, vel quæ à suo influxu informatur: dicitur 1. causa strictè, physica, he, talis. quæ realiter existens ab actione, quatenus actio est, essentialiter, determinatè, & immediatè respicitur: dicitur 2. immediatè recipiens actionem, vel*



quæ à suo influxu informatur, h. e. actio formaliter sive ex sua natura unitur cum sua causa: & ideo dicitur passio. Et licet actio juxta Thomistas recipiatur in causa efficiente, in illa tamen tam parùm recipitur formaliter, h. e. ex natura influxûs, quàm in termino, terminus enim non ideo est terminus, quia recipit actionem, sed quia per actionem, quæ censetur esse via, producitur. Idem dic de causa efficiente &c.

Dico 3. Causa materialis utraque datur. De intrinseca nemo dubitat, quia datur corpus naturale, constans subiecto & forma, ergo. Datur etiam extrinseca & purè sustentativa, h. e. talis, quæ non sit simul efficiens, sic cōm. Prob. 1. quia debet dari discrimen inter generationem, & creationem: ergo materia prima debet se aliter habere, ad productionem formæ materialis, quàm animæ rationalis; hæc enim juxta omnes creatur, illa generatur: & ad utriusque productionem connaturaliter prærequiritur materia prima organizata, ergo. 2. quia negata causa materiali extrinseca, omnia crearentur, sive fierent ex nihilo sui, & ex nihilo subiecti, sicut anima rationalis: ergo creaturis aliquid producentibus, v. g. hanc conclusionem affirmantibus, competeret vis creativa; quod hætenus nemo admisit.



Ob. 1. cum Lessio : generationem per hoc differre à creatione, quòd generatio sit productio termini, semper connaturaliter exigentis esse in subiecto, ut sunt omnes formæ materiales. & accidentales : creatio- nem verò, quòd sit productio termini, vel nunquam volentis esse in subiecto, ut An- geli, vel non semper, ut anima rationalis. R. hoc discrimen non sufficere 1. quia ge- neratio & creatio non tantum ratione ter- mini, & extrinsecè, sed etiam ratione sui, vel intrinsecè differunt. 2. quia eadem res po- test divinitus generari & creari, ut docet & sentiunt omnes, v. g. formæ materiales, uniones, gratia sanctificans, possunt creari vel generari. 3. quia sic quantitas Eucharis- tica sine subiecto conservata non create- tur, sed æquè generaretur, ac si esset in suo subiecto sustentativo, quia quantitas utpo- te accidens semper exigit esse in subiecto : ergo.

Ob. 2. cum docto quodam Recent. actio generativa & creativa per hoc diffe- runt, quòd generatio sit actio productiva formæ, & unionis, vel essentialiter respecti- va actionis unionem producentis, creatio verò, quòd sit actio carens omni nexu es- sentiali cum actione productiva unionis. Sed contra est. 1. quia sic unio non posset creari, saltem materia 1. non posset elevari



ad creandam unionem. 2. quia sic anima rationalis non crearetur, si Deus actioni creativæ essentialem appetitum ad unionē, quam Deus semper in creanda anima intendit, superadderet. 3. quia sic totus equus ex nihilo sui, & ex nihilo subiecti per unicam actionem productus (sicut aliqui docent contigisse in mundo creato) esset generatus; sequela probatur, quia effectio equi esset actio productiva formæ & unionis, ergo. 4. quia sic creatio esset generatio, creatio enim est actio, & sui ipsius unio: ergo, cū creatio sit productio sui ipsius, utique erit actio productiva unionis. Verbo, non placet hoc discrimen propter sequelas contra omnes ferme doctores admittendas.

Ob. 3. si causa materialis extrinseca vi sui influxūs, vel actionis passivæ recipiet educationem, tunc iam facit compositum accidentale, & sic omnis causa materialis est intrinseca: ergo extrinseca est intrinseca. R. concesso anteced. disting. consequ. extrinseca est intrinseca quoad educationem, concedo: quoad terminum educatum, nego consequentiam; quia licet actio educativa vi suæ productionis, indispensabiliter recipiatur in sua causa, & naturaliter suum terminum invitet efficaciter ad idem subiectum, terminus tamen supernaturaliter posset



posset non uniri suæ causæ: ergo causa materialis vi suæ productionis, rectè dicitur extrinseca, intellige quoad terminum per actionem intentum.

*§. 3. De causalitate causæ materialis extrinsecæ, & an actio eductiva, & passio realiter distinguantur?*

**D**ico r. Causalitas, vel influxus actualis causæ materialis extrinsecæ est actio eductiva, sustentatio sive passio. Sic communis. Prob. 1. quia illud est causalitas alicujus causæ, quo posito causa redditur actu causans: sed posita actione eductiva, vel passione, causa sustentativa redditur actu causans: ergo. Major est apud omnes certa, minor patet ex eo, quia de conceptu causæ sustentativæ est, ut actio indispensabiliter pendeat ab hac causa, jam aliunde physicè existente, & simul illius sic essentialis, & immediata informatio: sed hoc habetur per actionem eductivam: ergo. Prob. 2. quia sic causa sustentativa optimè distinguitur ab efficiente per indispensablem receptionem actionis, sive per passionem: ergo pro causalitate hujus cau-



se rectè assignatur actio eductiva. Prob. 3. quia causa sustentativa non concurrit activè, hoc est, ex sua virtute, sed concurrit passivè, instar mendici eleemosynā excipientis : ergo causalitas illius est passio, vel sustentatio, hoc est, actio productiva termini recepta in subiecto naturā priori.

Dico 2. actio eductiva & passio realiter non distinguuntur. Sic testatur Philosophus lib. 3. tex. 9. asserens : moventis & mobilis, hoc est, agentis & passi unum esse actum, sicut unum est intervallum aut via in itū & reditu ab urbe ad urbem v. g. Thebis Athenas & vicissim, Prob. 1. quia eadem actio, in quantum essentialiter respicit & dependet à subiecto, ut aliunde realiter existente, est actio, in quantum verò essentialiter, & immediate recipitur, est passio : ergo actio & passio tam parum distinguuntur realiter, quàm visio, quæ quoad oculum potest dici activa, & quoad murum passiva. 2. quia actio non debet necessario recipi in causa efficiente ; datur enim juxta omnes actio tam transiens, quàm immanens : ergo nulla est ratio, aut necessitas actionem distinguendi à passione. 3. quia si actio non esset ipsa passio, vel essentialis informatio sui subiecti, quod actio prius naturā constituit, tunc ipsa actio eductiva non esset generatio, sed creatio ; sequela



quela probatur, quia actio non ideo est generativa, quia essentialiter respicit subiectum naturā prius, sed quia etiam in ipso essentialiter recipitur. Et hoc patet ex eo, quia anima rationalis potest à Deo, & simul à materia prima per potentiā obedientialem creari &c. ergoeductio debet esse essentialis dependentia à subiecto, jam aliunde realiter existente, & simul actualis illius informatio. 4. quia actio eductiva debet recipi in subiecto, & passio debet produci per actionem; sed sicut actio recipitur per se ipsam sine unione distincta, sic passio producitur per actionem indistinctam, alias daretur processus in infinitum, vel ipsa actio eductiva passionis esset simul actio & passio: actio, quatenus educeret passionem ex subiecto; passio, quatenus actio per suam essentiam reciperetur in subiecto.

Ob. 1. actio est influxus vel via, qua agens agit, & passio est influxus, quo subiectum patitur: sed hi influxus debent distingui: ergo. R. concessa maiore, nego minorem, quia eadem forma propter diversam habitudinem subiecti, quod forma afficit, potest causare diversos effectus formales, sicut enim eadem actio denominat causam agentem, & effectum productum, & sicut eadem cognitio muri facit



Petrum cognoscentem & murum cognitum; sic eadem actio eductiva potest unam causam reddere agentem, & alteram patientem.

Ob. 2. in divinis actio generativa realiter distinguitur à passione; Pater enim distinguitur à filio; ergo idem dici debet in generativa actione, & passione creata. R. distinguo antecedens: & hoc provenit ex eo, quòd Pater sit ipsa actualis determinatio, vel generatio activa filii; concedo, quòd Pater sit indifferens ad productionem filii, sicut causa creata respectu effectus; nego antecedens, & consequentiam. Deinde sicut creatio activa non distinguitur à passiva, sic actio eductiva non distinguitur à passione.

#### *§. 4. De causa formali, & causalitate illius.*

**D**ico 1. causa formalis nil est aliud, quàm forma vel pars compositi magis determinativa vel perfectiva. Quatenus hæc forma subiecto unita, causat aliquod totum, vocatur causa formalis constitutiva, quatenus propter contrarias qualitates, vel propter incapacitatem subiecti formam expellit secum impossibilem, dicitur causa formalis expulsiua, Sic omnes.

Dico



Dico 2. Causalitas causæ formalis constitutivæ in actu secundo est unio. Ratio est, quia hæc causa formalis, quatenus constituit totum, est causa intrinseca: ergo 2. quia sicut se habet actio ad causam extrinsecam, ita se habet unio respectu formæ, quæ subiectum actu non informat, nisi posita unione: ergo. Causalitas verò causæ formalis expulsivæ includit 2. scilicet negationem actionis conservantis formam vel unionem illius, & decretum Dei non amplius volentis in subiecto conservare formam antiquam, propter novam eidem subiecto introductam. Ratio est, quia his duobus positis habetur expulsio formæ antiquæ dependenter à nova introducta, & uno ex istis ablato non habetur: posset enim divinitus esse introductio novæ formæ sine expulsionem antiquæ, & posset esse expulsio formæ antiquæ sine introductione novæ: ergo causalitas est aliquod conflatum ex negatione actionis formam antiquam in subiecto conservantis, & ex decreto Dei illam negationem decernentis propter novam formam introductam.

Ob. 1. Causa expulsiya non est forma respectu formæ expulsæ: ergo malè dicitur causa formalis respectu illius. R. licet forma nova introducta Deum moveat, ut propter impossibilitatem formarum cesset



cesset conservare formam antiquam, & sic causa expulsiva sit causa moralis efficiens, quia tamen hoc fit propter actualem informationem, sive dum actu informat subiectum, ideo forma, quia est causa expulsi-  
onis, dici potest causa formalis expulsiva.

Ob. 2. si adest decretum Dei volentis destruere formam antiquam ob introductionem formæ novæ, tunc adest tota causalitas formæ expellentis: ergo frustra superadditur negatio actionis conservativæ, quia impossibile est decretum Dei frustrari vel privari suo effectu: ergo. R. disting. præsentem decreto Dei adest tota causalitas radicalis, h. e. decretum infallibiliter secum trahit negationem actionis conservativæ, concedo, adest tota causalitas formalis, nego antec. & consequ. sicut enim decretum Dei non facit murum formaliter album, sic se solo non est formalis expulsio formæ, sed causalis vel radicalis.

*§. 5. An, & quomodo introductio formæ sit prior composito & formæ expulsæ?*

**D**ico 1. Introductio formæ novæ, & expulsio antiquæ, sunt in uno instanti reali. Prob. 1. quia aliàs materia 1. pro aliquo instanti vel nullam haberet formam, vel



vel duas simul; nullam, si expulsio præcederet, duas, si ante expulsionem poneretur introductio. 2. quia forma nova & antiqua pugnant de subiecto per qualitates prævias: ergo introductio unius formæ, & expulsio alterius possunt esse in eodem tempore, quia formæ substantiales non debent simul existere, sicut duo adversarii de uno loco decertantes; Deus enim in primo instanti videns, in secundo positum iri ultimam dispositionem, unde unde causatam, decernit positionem formæ novæ, & desitionem antiquæ: ergo.

Dico 2. Causa formalis compositi non est prior naturâ respectu compositi, est tamen prior à subsistendi consequentiâ respectu illius. Prima pars patet ex eo, quia causa intrinseca nil physicè producit aut determinat ad existendum, sed se tantum communicat toti; nam licet unio physicè producat à forma, forma tamen respectu unionis à se productæ non est causa intrinseca vel formalis, sed extrinseca & efficiens: confirmatur conclusio, quia prioritas naturæ habetur ab actione, sed causa intrinsecæ non influunt per actionem: ergo. Probatur secunda pars: quia ex toto possum inferre quamlibet partem, sed non vicissim: ergo pars est prior toto per illationem, si-ve à subsistendi consequentia.

Dico



Dico 3. Introductio novæ formæ est causa & prior naturâ expulsiōe formæ veteris positivæ; dixi positivæ, quia introductio lucis non est causalis, sed formalis expulsiō tenebrarum: ergo talis introductio non potest esse prior naturâ: nunc prob. conclusio 1. quia illud est prius natura, & causa moralis alterius, quod ut iam existens movet agens ad aliquid faciendum vel destruendum: sed hoc facit introductio, vel nova forma introducta; ergo. Mai. communiter apud omnes est certa, min. prob. quia nova forma utique non producitur à proprietatibus formæ veteris, neque ab ipsa forma vetere: ergo nova forma, ut aliunde existens movet Deum ad veterem expellendam. Prob. 2. quia sicut ultima dispositio est simul tempore & prior naturâ respectu suæ formæ, sic productio novæ formæ est simul tempore, & prior naturâ, respectu expulsiōis formæ antiquæ, prius concedunt omnes, ergo & posterius. Prob. 3. quia ultima dispositio ideo est prior naturâ, quia aliunde existens movet Deum ad positionem formæ, sed hoc totum facit introductio novæ formæ: ergo est prior naturâ. Prob. 4. quia forma antiqua tam diu debetur subiecto, quamdiu non supervenit alia forma impossibilis: ergo introductio formæ novæ est causa expulsiōis: ante-

tccc-



recedens pater ex eo, quia gratia sanctificans non expellitur, nisi peccato introducto: ergo.

Ob. 1. forma antiqua est impedimentum, quo minus introducatur forma nova: ergo forma antiqua debet prius expelli: ergo expulsio est prior naturâ. R. hoc impedimentum tolli posse per actum secundum, sive per positionem, vel introductionem formæ; Deus enim in priori instanti, imò ab omni æternitate prævidens dispositiones, & positionem formæ propter dispositiones, ponit formam novam, & propter novam solet veterem expellere.

Ob. 2. sicut generatio unius est corruptio alterius, sic corruptio unius, est generatio alterius: ergo utrumque vel neutrum est prius naturâ. R. licet ex correlativis utrumque inferri possit, v. g. datur causa, ergo effectus; datur effectus, ergo causa, non tamen sequitur, quòd utrumque sit causa, vel prius naturâ; quòd autem generatio sit causa movens Deum ad destructionem formæ, desumitur ex fine causarum inter se pugnantium, quæ ex sua natura potius & prius intendunt productionē entis, quàm destructionem. Deinde non ideo introducitur nova forma, quia expellitur antiqua, sed ideo expellitur antiqua, quia introducitur nova, ut patet in expulsione gratiæ, & introductione peccati, Ob.



Ob. 3. si forma nova est prior naturâ, tunc dantur simul duæ formæ, quia tamdiu manet forma vetus, quamdiu non destruitur, sed pro illo signo, pro quo est nova forma, non destruitur; ergo manet; ergo dantur simul duæ formæ. R. disting. tamdiu forma vetus manet in reali duratione, quamdiu non destruitur, cōcedo, pro priori signo naturæ, nego! quia pro priori signo naturæ tantum manet id, quod est causa, vel se tenet ex parte causæ potentis causare; ergo.

## DE CAUSA FINALI, ET EXEMPLARI.

### §. I. *Quid, & quoduplex sit finis?*

**F**inis variè accipi potest. 1. pro extremo cuiusque rei, quatenus opponitur principio. sic mors est finis vitæ, epilogus finis comœdiæ. 2. pro inclinatione rei, sic lapis ex suo fine properat deorsum, ignis sursum. 3. philosophicè pro eo, quod principium cognoscitivum movet ad amorem, & prosecutionem sui.

Dico 1. Finis est causa motiva, ut sit; per hoc enim differt à reliquis causis, non



ut sint, sed quia sunt, causantibus: vel sic: finis est id, cuius gratiâ aliquid fit, ita ex Arist. Philos. omnes. Dicitur 1. cuius gratiâ, h. e. propter quod obtinendum. Dicitur 2. aliquid fit, non tamen ponitur aliud, quia licet plerumque ad finem obtinendū aliquid aliud, h. e. media realiter distincta producantur, v. g. missio sanguinis, vel ambulatio ad sanitatem procurandam, ad essentiam tamen causæ finalis non requiritur, ut aliquid à fine distinctum producat; ut pater in amore Dei, cuius bonitas cognita utique potest cognoscentem alligere ad productionem sui; sed amor Dei juxta talem apprehensionem operantis est finis vel causa finalis, & ad hunc amorem obtinendum nil debet aliud produci: ergo. Cæterum adæquata ratio finis ex tribus componitur. 1. ex parte acquirēda *ut quod*, 2. ex parte acquirenda *ut quo*, 3. ex *subiecto*: pars vel res acquirēda ut quod vocatur finis *cuius*, vel *qui* obiectivus, ut est sanitas: pars vel res acquirenda, *ut quo* est ipsa unio, vel possessio boni intenti, diciturque finis formalis, vel finis *quo*. Denique illa res aut persona, cui bonum quasi forma acquiritur, vocatur subiectum vel finis *cui*. Itaque, finis conflatur ex fine obiectivo, subiectivo & formali, vel quasi ex materia, forma, & unione.

Dico



Dico 2. finis datur multiplex: v.g. universalis h. e. pluribus communis, ut est gloria Dei; particularis vel uni proprius, ut est conservatio proprii individui. Intrinsecus sive per se à scientia vel arte intentus, ut est sanitas in Medicina: extrinsecus vel per accidens, ut sunt opes respectu ejusdem artis medicæ. Ultimus vel propter quem cetera omnia fiunt, ut est Deus; non ultimus vel intermedius h. e. talis, qui propter suam bonitatem appetitur, ita tamen ut etiam appetatur propter aliud, ut sunt fines artium & scientiarum, quæ tandem diriguntur ad gloriam Dei &c.

Ob. 1. causa finalis malè dicitur causa motiva ut fiat, quia finis hominis est Deus: & finis vel causa finalis mercenarii propter mercedem operantis sunt pecuniæ, utique jam factæ: ergo ad essentiam causæ finalis non requiritur, ut primum fiat. R. licet finis qui objectivus sæpe non producat, & tantum sit objectum formale; finis tamen qui formalis, sive finis quo h. e. unio semper debet produci. Cum ergo finis qui objectivus & finis cui sint partes finis adæquatè moventis, & cum hoc complexum in ratione totius semper producat, ideo finis qui & cui, licet non producantur, & sint tantum objectum formale, ratione totius tamen ab operante intenti dici possunt causæ finales.

Ob.



**Ob. 2.** finis *qui* licet producat v. g. sanitas, non tamen amatur propter se, sed ordinatur ad finem cui, sive ad hominem: ergo finis *qui* non habet rationem finis sed medij. R. rationem medij non in hoc consistere, quòd attribuat alteri quomodo-cunque v. g. ut i subiecto, sed quod ordinetur ad aliud acquirendum vel producendum, hoc autem finis qui in allato casu non habet: ergo. An autem ratio finis magis conveniat fini *cui* vel *cujus*? pendet ex maiore amore unius prae altero: sic si Deum amamus ex amore concupiscentiae, finis *cui* (nempe nos) magis amatur, si amore amicitiae, finis *qui* hic, Deus magis amabitur.

**§. 2.** *An finis sit vera causa, & quæ sit virtus illius?*

**D**ico. 1. finis est vera causa. Prob. 1. quia causa ab omnibus dividi solet in 4. genera causarum: ergo. Prob. 2. quia illud est vera causa, à quo per se & realiter pendet effectus; sed effectus physicus ita pendet à causa finali: ergo. Mai. videtur ex terminis nota, min. probatur: ab eo enim per se & realiter effectus dependet, propter quod effectus producit, sed propter finem à causa efficiēte  
per



per illius bonitatem motû producitur effectus; v. g. sumptio pharmaci & missio sanguinis; ergo. Confirm. quia causæ physicae & morales ideo sunt veræ causæ, quia effectus ab illis dependet, sed idem fit in causa finali: ergo. Prob. 3. quia causa efficiens nil agit sine finali iuxta illud: omne opus naturæ est opus intelligentiæ: ergo causa efficiens, ne temerè agat, exigit agere propter finem, sive propter bonitatem in effectû repertam: ergo causa finalis est vera causa.

Dico 2. virtus causæ finalis quoad actus prosequitivos est quævis bonitas iuncta vel honesta etiam ficta, & in se impossibilis, modò appareat ponibilis, quoad actus verò averfativos est malitia. Prob. 1. quia virtus causæ nihil est aliud quàm aptitudo finaliter & ultimariè movendi voluntatem, sive est bonum per se & per suam propriam bonitatem potens movere: sed in bono etiam ficto datur talis aptitudo vel bonitas. Prob. 2. quia voluntas cum sit potentia cæca, non judicativa nec discretiva veri à falso, potest ab intellectu nimis credulo, vel unde unde decepto induci ad rem Chymericam amplectendam. Confirm. quia bonum utile quâ tale ideo cõmuniter excluditur à ratione finis, quia utile quatenus est in intellectu operantis per se, sive per suam



suam propriam bonitatē non movet voluntatem, sed movet per alienam scilicet per vel propter honestatem vel delectabilitatem: ergo ad virtutem causæ finalis requiritur, ut sit bonum per se potens movere.

Ob. 1. quod realiter non existit, non potest realiter causare: sed causa finalis dum causat, realiter non existit; ergo non potest realiter causare, R. cum distinct. quod non existit, non potest realiter efficienter vel physice causare, concedo: non potest finaliter causare, he, bonitas finis cognita non potest movere voluntatem ad complacentiam, amorem, ad actum imperantem & procuracionē mediorum, nego.

Ob. 2. bonitas ficta & impossibilis non potest esse causa finalis, quia voluntas cum sit potentia realis, debet habere objectum reale, & non tantum apparens, aliās voluntas cum vellet bonum apparens, vellet ipsam cognitionem; tota enim apparentia bonitatis fictæ consistit in ipsa cognitione. R. cum distinct. voluntas debet habere objectum reale & possibile secundum apparentiam, concedo: in se, nego, ad probationem dico: licet apparentia consistat in cognitione, nō tamen sequitur, me velle cognitionem; sicut enim, si volo lac album, non tamen dicor me velle albedinem, sic licet cognitio chymæram denominet



48 DE CAUSA FINALI  
minet bonum apparens, non tamen volo  
cognitionem sive formam denominan-  
tem, sed illud volo, quod denominatur  
bonum.

§. 3. *An cognitio sit, vel possit esse  
virtus causa finalis?*

Dico 1. Cognitio, in quantum præcisè  
repræsentat bonum, non est virtus  
causæ finalis, sed est pura conditio sive ap-  
plicatio ipsius motivi vel virtutis. Prob.  
1. quia si cognitio esset tota virtus, vel pars  
illius, tunc deberet amari, & media, quæ ad  
finem acquirendum adhibentur, deberent  
conducere ad productionem illius cogni-  
tionis, sed nil horum fit; cognitio enim  
jam præsupponitur esse, antequam finis  
movendo causat; ergo. Probatur 2. à pari,  
quia applicatio agentis ad passum est me-  
ra conditio agentis, & non virtus; ergo  
etiam cognitio (quæ est applicatio boni-  
tatis voluntati repræsentativa) non erit vir-  
tus, sed mera conditio ad causandum. 3.  
quia causa finalis est illud, quod intendi-  
mus acquirere, sed cognitionem quatenus  
præcisè repræsentat bonitatem, non inten-  
dimus acquirere, neque illa movet volun-  
tatem ad operandum: sicut enim cogni-  
tio



io mali non est ipsum malum, quod nos movet ad fugam mali, sic cognitio vel representatio non est illud bonum, à quo movemur ad prosecutionem & amorem illius.

Dico 2. Cognitio reflexè cognita, sive quatenus est objectum cognitionis, potest esse virtus causæ finalis. Prob. 1. quia virtus causæ finalis & bonum sunt idem: sed cognitio reflexè cognita potest ab intellectu representari ut bona: ergo cognitio per suam bonitatem potest voluntatem movere ad amorem & prosecutionem sui. Prob. 2. quia visio beatifica Dei. Item scientiæ actuales speculativæ sunt cognitiones, sed hæc amantur & movent voluntatem gratiæ sui sive propter suam bonitatem: ergo cognitio reflexè cognita potest esse virtus causæ finalis.

Obijcies 1. Existentia causæ finalis habet se ad causam finalem, sicut existentia causæ efficientis ad causam efficientem: sed existentia causæ efficientis non est mera conditio ad agendum, sed causa: ergo cognitio non est mera conditio, sed est ipsa causa vel virtus causæ finalis. R. nego mai. & parit: quia existentia causæ efficientis est intrinseca & identificata cum causa efficiente, intencionalis verò



50 DE CAUSA FINALI  
existentia causæ finalis est extrinseca illi  
bonitati, quæ allicit voluntatem.

Ob. 2. finis ut cognitus movet ; &  
cognitio constituit actum primum causæ  
finalis potentis causare : ergo cognitio est  
virtus, vel pars causæ finalis constitutiva.  
R. licet cognitio in causa finali proximè  
completa involvatur, sicut aliæ conditio-  
nes in causa efficiente completa, non ta-  
men sequitur, quòd cognitio repræsentati-  
va finis habeat rationem motivam ; sic-  
ut enim approximatio ignis non urit, siue  
non est virtus causativa ignis, sic cognitio  
neque est id, quod amatur, neque id, quod  
movet aut impellit, neque quod à cogno-  
scente intenditur ; ergo.

Ob. 3. mutata cognitione mutatur vir-  
tus alliciens, & mutatur effectus causæ fi-  
nalis, nempe actus voluntatis, ergo signum  
est, non tantum conditionem, sed virtutem  
causæ finalis esse mutatam. R. disting.  
antec. mutata cognitione mutatur virtus,  
si variatio cognitionis proveniat ex varia-  
tione objecti, concedo, si variatio præcisè  
se teneat ex parte solum cognitionis v. g. si  
pro clara cognitione A ponatur clara co-  
gnitio B, nego anteced. & consequ. quia li-  
cet bonitas objecti diversis cognitionibus  
claris vel obscuris proposita, magis. & mi-  
nus movere possit, instar ignis magis vel  
mi-



minus applicati, cognitio tamen merè repræsentativa finis, quæ est applicatio intentionalis, tam parum est virtus vel causa finalis aut motiva, quàm applicatio physica sive approximatō ignis ad passum.

#### *§. 4. De effectu causæ finalis, & causalitate illius.*

**D**ico 1. Effectus causæ finalis est omne id, quod fit finis gratiâ, sive quod producitur ad cognitam bonitatem finis, quam pîerumque sic prosequimur obtinendam. 1. visa bonitate consequibili oritur simplex complacentia, sive præviuus actus, & quædam velleitas disponens ad sequentes effectus. 2. elicitur amor & intentio finis propositi, imperans inquisitionem mediorum. 3. fit indagatio, consultatio, & electio mediorum. 4. potentiis externis imperatur executio, & media adhibentur, v. g. medicus vocatur, pharmaca præparantur, sanguis mittitur &c. 5. finis, antea tantum cognitus, nunc realiter producitur. Et tandem ex fine, jam obtento, vel præsentē, oritur gaudium & fruitio finis, potiùs effectus causæ efficientis, quàm finalis, quia gaudium non ponitur, ut sit, vel fiat finis, sed quia jam est positus: gaudium tamen



ab intellectu cognitum, quia in se bonum est, potest esse causa finalis, provocans voluntatem per actum amoris voluptuosi ad sui prosecutionem.

Dico 2. Causalitas finis in actu secundo dicitur esse motio metaphorica, sive est actio productiva effectus, prout connexa cum tali fine. Ratio est, quia ad causalitatem essentialiter duo requiruntur. 1. ut sit actualis productio effectus. 2. ut hic numero effectus per productionem indispensabiliter pendeat ab hac causa: sed hæc duo habentur per talem actionem: ergo. Cum actio in effectibus immediatis, vel internis identificetur cum ipsis effectibus intentionalibus, & effectus, non quidem physice tanquam à causa physice influente, sed intentionaliter tanquam ab objecto, quod representant, essentialiter dependant, causalitas est sola actio vel entitas talium effectuum. Quoad effectus verò extrinsecos sive mediatos causalitas non est sola actio productiva effectuum, quia actio est indifferens, an procedat ex hoc vel illo motivo sive fine, (ambulatio enim posset poni ex alio motivo quàm ex motivo sanitatis) sed causalitas est quoddam complexum ex actione physica & decreto Dei illam cum fine connectentis. Ratio est; quia istis positis



tis nulla est indifferentia, & uno eorum ablatο manet indifferentia : ergo.

Ob. 1. Causalitas causæ finalis est vera entitas vel influxus physicus : ergo malè dicitur motio metaphorica. R. motionem causæ finalis vel motivæ ideo dici metaphoricam, licet in se sit influxus realis, quia causa finalis non est causa strictè physica, sed intentionalis vel motiva, adeoque influxus non est propriè physicus, sed intentionalis, quem vocant metaphoricum.

Ob. 2. si datur causa finalis, quæ per procurationem mediorum tendat ad sui existentiam, tunc causa finalis quoad primum esse reale producit seipsam, sed nihil, (ut supra vidimus) potest producere seipsū : ergo causa finalis non datur, vel non tendit ad sui productionem, sive existentiam. R. disting. causa finalis seipsam producit physicè, vel, ut aliunde existens, nego : intentionaliter, vel movendo, & ut exitura, concedo mai. & disting. min. nihil potest seipsum producere physicè, vel aliunde jam existens, cōcedo min. finaliter, h. e. propter visam bonitatem movendo causam efficientem, nego minorem, & consequentiam, quia hīc nulla sequitur contradictio, quam sequi vidimus in alia causa secundum existentiam causante.



*§. 5. Quibus entibus agere competit propter finem?*

**N**Otand. est agere propter finem tripliciter sumi posse. 1. latè quatenus quævis essentia tendit in suum bonum, etiam nullâ præsuppositâ cognitione, sic gravia deorsum, levia sursum tendunt. 2. strictiùs, sed, impropriè & materialiter, quatenus aliqua causa præsupposita cognitione conatur per media acquirere bonum, quorum tamen mediorum cum fine proportionem non cognoscit. 3. propriè & formaliter agere propter finem, est bonum cognitum ita procurare per media, ut ab operante cognoscatur proportio mediorum cum fine, & sic actu judicativo fiat aliqua comparatio inter finem & media. His positis

Dico 1. Deum, Angelos, & homines agere formaliter propter finem. Ratio est, quia cognoscunt proportionem, conducibilitatem, & convenientiam mediorum cum fine, & sic operantur: ergo. Deus enim hominem creat, & quandoque etiam vocat ad studia, atque religionem, ut suo fine, h. e. gloria in celo donetur sublimiore. De Angelis res æquè clara est; quid enim illi non faciunt per sua obsequia, inspirationes, custodiam &c. ut nos sibi in celo coniungant



gant beatitudinis socios. De hominibus quotidiana docet experientia; studiosus enim, v. g. ideo se bene gerit, & studet, ut post studia suæ cuticulæ, mundo honoratiori, aut Deo melius possit inservire: ergo.

Dico 2. bruta propriè & formaliter non agunt propter finem. Prob. 1. quia licet bruta cognoscant media & finem, non tamen vident utilitatem & proportionem mediorum ad finem; hanc enim si viderent, jam compararent medium cum fine, adeoque judicarent medium esse aptum ad finem, sed bruta carent omni actu judicativo: ergo. Prob. 2. quia sufficit determinatio naturæ sine comparatione à brutis facta; canis enim viso baculo fugam arripit, absque eo, quòd quasi discurrat: ad hoc, ut vitæ verbera, de eo fugere: ergo bruta formaliter sive comparando media cum fine, non agunt propter finem.

Ob. 1. omnium agentium operationes dicuntur esse propter finem; opus enim naturæ est opus intelligentiæ; ergo bruta & agentia inanimata agunt propter finem. R. disting. omnium agentium operationes sunt propter finem ex directione & intentione causæ primæ, sicut sagitta ex impulsu à sagittario impresso properat ad finem. concedo: ex cognita proportionem mediorum cum fine, nego antec. & conseq.



Ob. 2. bruta non minus cognoscunt convenientiam mediorum cum fine, quàm pueri & amentes, non quidem ex iudicio, sed apprehensione vel imaginatione utilitatis unius rei ad aliam. Deus enim ut Auctor naturæ debet brutis aliquas species insensatas, h. e. à sensibus exterioribus non collectas in prima illorum productione indidisse, quæ necessariae sunt ad vitam tuendam, & suam speciem propagandam, ut infinitis experimentis probari posset: hirundo enim, dum colligit paleas, illasque aquâ & luto permiscet, videtur cogitare de ovis & pullis excludendis: aranea laboriosam facit telam ad muscas capiendas: canis videtur motum in altum eligere, tanquam medium utile ad acquisitionem panis ostensi; & sic de aliis. Hæc istas & alias experientias rectè explicari posse per instinctum naturæ, per actus elicitos bruta determinantis ad varia objecta amplectenda, non secus ac fieri solet quandoque in feminis prægnantibus, quæ occulto quodam instinctu incitatae cretas, carbones & alia paradoxa devorare nituntur. De pueris & amentibus res facilis est; hi enim si habent cognitiones imperfectiores non comparativas, materialiter tantum, hoc est, ponunt illa, quæ ad finem sunt apta, nō tamen formaliter, h. e. per iudicium



dicium comparativum agunt propter finem. Aliqui illum instinctum non distinguunt à phantasia, alii requirunt species superadditas, quidquid sit, bruta non probantur formaliter agere propter finem.

*§. 6. Quid & quotuplex sit Causa exemplaris, quæ virtus & causalitas illius?*

**D**ico 1. Causa exemplaris definiri solet esse id, in quod operans inspiciendo operatur. Si res exterius ob oculos statuitur ad imitandum, vocatur exemplar externum & remotum: si interius concipiatur aliqua res, quam agens, sicut cognoscit faciendam, intendit facere, ut loquitur Suarez disp. 25. s. 2. n. 40. dicitur exemplar internum, objectivum, proximum. Ipsa verò cognitio talis rei faciendæ nuncupatur idæa interna formalis v. g. pictor imaginem factururus primò aspicit verum palatium, deinde concipit palatium coloribus exprimendum. Verum palatium vocatur idæa externa objectiva vel remota; exprimendum nominatur idæa interna objectiva proxima. Cognitio illius palatii dicitur idæa formalis.

Dico 2. proxima virtus causæ exemplaris



plaris est aptitudo vel res ipsa sicut facienda cognoscitur, potens fieri ex intentione agentis, prob. 1. quia idea propriè non consistit in cognitione, quæ (sicut de causa finali diximus) est tantum conditio applicandæ internæ objectivæ, ergo cognitio non est virtus. Prob. 2. quia illud est virtus vel idea in actu primo, quod artifex intendit exprimere, sed illud, quod animo concepit, non verò suam cognitionem, quam reflexè non cognoscit, intendit exprimere & producere, ergo.

Dico 3. Causalitas in actu secundo est actio productiva talis idææ objectivæ cum decreto Dei, concurrentis propter ipsam rem cognitam & intentionem agentis. Ratio est, quia his positis habetur causalitas actualis, & uno ablato non habetur: ergo.

Ob. 1. tam causa finalis quàm exemplaris tantum intentionaliter existit & movet ad productionem sui; ergo causa finalis ab exemplari non distinguitur. R. trans. antec. nego consequ. 1. quia in causa exemplari datur duplex idea objectiva, interna & externa, sed externa iam physicè existit 2. quia causa finalis potius movet voluntatem ut sit vel fiat; exemplaris verò magis dirigit intellectum præscribendo modum operis faciendi. 3. quia bonum utile, quâ  
utile



utile potest esse idæa interna objectiva, non tamen causa finalis 4. quia non requiritur ad essentiam idææ, ut res concepta producat, sed sufficit, si idæatum vel productum habeat aliquam similitudinem cum illa, alias in hominibus plerumque nullæ darentur idææ, sæpe multum à suo exemplari deflectentibus.

Ob. 2. si datur causa idæalis, tunc etiam datur in Deo, quia Deus etiam prius concipit res postea faciendas, sed non potest dari talis causa, quia Deus non dependet à creaturis. R. in Deo dari idæas tam effectrices vel formales, hoc est cognitiones divinas cum omnipotentia identificatas, quàm objectivas, à quibus Deus non dependet, nisi cōditionatè h. e. si Deus creaturas vult producere, debet illas producere prout conceperat possibiles.

## D E C A V S A E F F I C I E N T E. I N C O M M U N I, E T C R E A T A.

*§. 1. Quid sit causa efficiens, quid principalis & instrumentalis?*

**D**ico 1. licet omnes Philos. ad causam  
C 6 effi-



efficientem ista, quæ sequuntur, requirant.  
1. ut per actionem influat & producat effectum à se adæquatè distinctum. Sic differt à causis intrinsicis non per actionem sed unigenem causantib<sup>9</sup> effectum h. e. compositum inadæquatè à qualibet parte distinctum. 2. ut independenter à suo effectu habeat suum esse reale; sic distinguitur à causa finali primùm, *ut fiat*, causante. 3. ut primò determinet v. g. ut causa efficiens in modo concurrendi se habeat instar dantis ex abundantia perfectionis, sive ut causa efficiens sit prior à subsistendi consequentia; rectè enim infertur, causa materialis operatur, ergo etiam efficiens sed non vicissim, vel ut à suo influxu formaliter non mutetur, sic differt à causa materiali extrinseca, quæ per suam causalitatem essentialiter immutatur, semper per illationem posterior causa efficiente, & se habet instar mendicantis atque recipientis ex indigentia: licet hæc, inquam, requisita communiter admittant omnes, magna tamen circumfertur copia definitionum: à plurimis causa efficiens propter auctoritatem Philosophi dicitur esse principium, unde primò est motus, hoc est, à quo' primò in executione procedit actio; vel sic: causa efficiens est causa strictè physica saltem æquivalenter præscindēs ab intrinseca mutatione sua.

Dico 2.



Dico 2. Causa principalis à variis variè explicatur, multùm in litis, & parùm utilitatis afferentib<sup>9</sup>, cùm sit mera quaestio de nomine, ut bene advertit Arriaga; à plurimis illa dicitur causa principalis, quæ est æquè vel magis perfectæ, quàm effectus, & ex sua natura habet vim illius productivam, ut ignis A, respectu ignis B, vel respectu caloris. Instrumentalis verò, quæ non operatur ex virtute naturali, sed à Deo elevatur, vel si operatur ex naturali virtute, producit effectum suâ causâ nobiliorem, ut accidens juxta Thomistas respectu substantiæ. Alii volunt, causam principalem esse finem cui, scilicet cui alia concausa deserviat, ut sunt artifices: instrumentalem verò esse medium, ut sunt omnia instrumenta, vel artificiata, v.g. calamus, penicillus, vel moralia, ut est servus respectu domini, creatura respectu Dei, illam ad quidvis producendum elevantis.

Ob. 1. principium, unde primò est motus vel actio, est causa finalis, nam causa efficiens, ne inordinatè agat, debet priùs moveri à fine; ergo causa efficiens malè explicatur per Tò primò: R. disting. à causa finali primò est motus intentionaliter, vel finaliter movendo, concedo; executivè vel realiter, ut à causa jam aliunde existente, nego anteced. & consequentiam.

Ob. 2. In causa efficiente identificata  
cum



cum materiali allatum discrimen est nullum, quia implicat eandem causam respectu ejusdem motus vel actionis esse principium primum & non primum, mutari & non mutari. R. implicare quidem, eandem rem realiter mutari & non mutari, esse primum & non esse primum, formaliter tamē impossibile non esse respectu diversorum prædicatorum, eadem causa reali duplex officium peragente, vel duabus causis realiter distinctis æquivalente, sic idem homo dicitur rationalis & sensitivus propter animam rationalem duobus principiis æquivalentem.

Ob. 3. causa instrumentalis est causa efficiens, sed ab hac primò non est motus, quia determinatur à causa principali: ergo. Respondent aliqui: causam instrumentalem licet determinetur à causa principali ad motum, distingui à materiali per hoc, quod per influxum non immutetur. Alii verò, comparisonem non debere fieri inter ipsas efficientes, sed inter efficientem, quæ semper se habet per modum dantis, & inter materiale semper instar accipientis se habentem.

Ob 4. anima rationalis vel angelus est causa principalis creata quoad suos actus supernaturales: ergo causa instrumentalis male dicitur illa, quæ non operatur ex virtute natu-



naturali. & aliquos negare antecedens, alios concedere, & definitioni causæ instrumentalis superaddere, nisi effectus h. e. terminus ex se petat à tali causa elevata procedere: dixi terminus, quia omnis actio petit esse à sua causa, & sic nulla daretur actio instrumentalis.

*§. 2. Quid sit virtus & causalitas causa efficientis?*

**D**ico 1. Virtus cujuscunque causæ, ut supra dixim⁹, est ipsa entitas cujuscunque causæ sive aptitudo vel potentia causandi. Ad hanc constituendam in causa efficiente non sufficit sola æqualitas, vel excessus perfectionis unius rei cum altera, aliàs quivis Angelus haberet virtutem producendi omnia sublunaria: sed plura requiruntur 1. ut virtus causæ efficientis adæquata præcontineat formaliter, vel eminenter totam perfectionem effectūs, & simul causalitatis, sive modi effectum producentis, quia non tantum effectus, sed etiam ipsa actio procedit ex virtute operantis: propter absentiam hujus perfectionis, quoad modum productivum quantitas in Eucharistia naturaliter conservari non potest. 2. ut nulla adsit ratio, vel speciale



ciale fundamentum aliquod comprincipium ponendi, hinc licet Deus sit præcontinentia omnis creaturæ, omnis effectûs & modi vel causalitatis aliquid producentis, se solo tamen non potest producere actionem eductivam, aliàs mutaretur Deus, neque se solo potest producere ullum actum vitalem creatum, essentialiter suæ causæ immanentem. 3. requirunt aliqui certam proportionem inter entitatem causæ & effectûs, nobis certè non aliter nisi per experientias sive à posteriori manifestatam.

Dico 2. Causalitas causæ efficientis, si physicè influat, est sola actio; si moraliter, est complexum ex actione & decreto Dei essentialiter totum actum primum representante. Ratio est, quia per actionem producit effectus & dependet ab hac causa physicè influente, à moralibus verò pendet per decretum Dei ita essentialiter connexum, ut patet ex dictis.

Ob. 1. si effectus essentialiter pendet ab aliqua causa, non debet superaddi, alia causalitas v. g. actio; sed omnis effectus vel creatura essentialiter pendet à Deo: ergo non debet superaddi causalitas. Confirmatur, quia actio ideo non producit per causalitatem distinctam, quia actio essentialiter pendet à sua causa: ergo. R. licet omnis creatura essentialiter pendeat à Deo, quia



quia tamen indifferens est, an hodie vel cras, an à solo Deo vel non solo, an hoc vel illo modo pendeat, nimirum per creationem vel generationem, ideo per actionem distinctam debet tolli hæc indifferentia. De actione nulla est paritas, quia essentialiter pendet ab hac causa & tali modo.

Ob. 2. Decretum Dei non est unio physica, neque est pars illius unionis: ergo decretum Dei non potest esse constitutivum causalitatis causæ moraliter concurrentis. R. concesso anteced. nego consequ. & paritatem, quia hic nullum sequitur absurdum, ut diximus in thesibus de unione, & nil reperitur aliud, per quod actio cum causis moralibus connectatur, quàm decretum Dei, ergo.

*§. 3. An datur causa efficiens creata. & an substantia sint operativa?*

**D**ico 1. datur causa efficiens creata. Ita concors omnium ferè doctorum consensus contra pauculos omnem actionem Deo & nullam creaturis adscribentes. Prob. 1. ex Conc. Trident. sess. 6. c. 4. damnante eos, qui dicunt, liberum arbitrium nostrum se ad suos actus habere merè passivè & velut inani-



inanimè instrumentum. Prob. 2. quia homo se determinat ad actus bonos vel malos, aliàs si non esset eorum causa, neque esset laude vel vituperio dignus. Prob. 3. quia datur motus localis, & cuilibet evidens est, aliter se habere, quando se movet, & aliter quando movetur ab alio: in motu priore fatigamur, vix in posteriore. Prob. 4. ab experientia; quia nobis est evidens, nos elicere varios actus intellectus & voluntatis, nos varia objecta antea non cognita cognoscere; varia velle & nolle, ergo datur causa efficiens creata.

Dico 2. substantia immediatè potest producere aliam substantiam & accidentia: sic communis contra Thomistas. Prob. 1. ratione; quia substantia formaliter ut causa æquivoca præcontinet perfectionem effectus, & nullum efficax affertur argumentum in contrarium, ergo. Prob. 2. ab experientia: videmus enim ignem produci ab igne, leonem à leone: item advertimus accidentia v. g. proprietates produci à substantiis; aqua enim calefacta statim igne remoto incipit se reducere ad frigus: ergo accidens potest produci à substantia; quia nulla alia videtur adesse causa frigoris productiva, non aer circumstans à sole vel igne calefactus, non solares radii, quia potius calefaciunt, non frigus internum, quia hoc  
sup.



supponitur à contrario extrinseco expulsum; ergo aqua producit in se frigus, quod est accidens; ergo substantia potest producere accidens.

Ob. 1. creatura non competit nobilissimus & divinus operandi modus, quem habet causa efficiens: hæc enim, ut S. Augustinus de Deo loquitur, lib. 1. Conf. c. 4. dat debita nulli debens, donat debita nihil perdens; ergo creatura non operatur efficienter. R. licet causa efficiens creata ex sua virtute aliquid producat, nihil perdens & accipiens, & sit præstantior reliquis causis, vel se communicantibus, ut causæ intrinsecæ, vel suam existentiam quærentibus, ut finalis, multum tamen differt à divino operandi modo; Deus enim se solo potest aliquid producere, & ex nihilo subiecti, sive creativè, neutrum competit causæ efficienti creatæ: ergo.

Ob. 2. prius est esse, quàm operari: ergo substantia in primo instanti reali non potest producere suas proprietates, sed illas accipit à generante, juxta illud, qui dat esse, dat etiam consequentia adesse. R. disting. anteced. prius est esse, quàm operari prioritate causalitatis vel naturæ, h. e. res debet physicè existere, ut aliquid causet physicè, concedo: prius prioritate temporis, nego: & axioma disting. qui dat esse, dat



dat etiā consequētia adesse, v. g. proprietates, dat ut causa remota vel moralis, siue ut physicē inadæquata, conced. dat physicē ut causa immediata totalis, nego: ratio est, quia in aliis casibus, quando duæ causæ in eodem instanti reali sunt applicatæ, dicuntur simul agere: ergo idem hîc fieri potest.

Ob. 3. si substantia in primo instanti producit suas proprietates v. g. ignis calorem & siccitatem, tunc datur mutua causalitas, quia calor tanquam dispositio producit formas saltem moraliter, & ab illa in eodem instanti producitur: ergo. R. nego sequelam: ad probationem dico: calorem & siccitatem in actu primo proximo siue in priore reali instanti temporis fuisse dispositiones, non autem in posteriori vel in actu secundo, in quo forma actu existit; in hoc enim, in quo forma vel ignis est productus, calor & siccitas incipiunt esse proprietates.

*S. 4. Quid accidens possit producere & an substantiam?*

**D**ico 1. accidens se solo potest producere aliud accidens. Prob. 1. quia unum acci.



accidens habet sufficientiam & proportionem ad aliud accidens producendum, nec datur efficax ratio in contrarium: ergo cum nova fiant accidentia, rectè dicuntur ab ipsis etiam accidentibus produci posse. Prob. 2. ab experientia: quia lux in suo subiecto producit calorem, & calor in aqua ferventi positus, in subiecto extraneo v. g. in manu producit alium calorem: nulla enim apparet alia causa productiva caloris, non ignis jam remotus vel extinctus, non aqua sui frigoris amantissima, non aër sæpe manum non immediate attingens, a quis immixtam, non Deus, uno calore ad alterum efficiendum satis apto.

Dico 2. accidens ut causa adæquata physicè non producit substantiam. Ita communis contra Thomistas. Prob. 1. quia causa adæquata debet effectum suum continere vel formaliter, virtualiter aut eminenter h. e. debet habere prædicata, quæ effectus habet, vel æquè perfectiora aut perfectiora, sed nullum accidens habet prædicata substantiæ, aut illis æqualia vel perfectiora: ergo accidens non potest se solo producere substantiam, quia non potest alteri dare, quod nō habet: ergo. Influxus enim est quædam assimilatio effectus cum sua causa, ergo quidquid bonitatis est in effectus.



fectu, debet præcontineri in causa. Prob. 2. quia causa instrumentalis non potest agere sine principali, sed accidentia sunt tantum causæ instrumentales, ut fatentur adversi. ergo. Probo maiorem, quia agens ut instrumentum, vel in virtute aliena operans, physicè non fit melius, si ve illa virtus aliena nunc nihil est, vel si realiter sit aliquid, v. g. virtus substantialis, tunc iam accidens se solo non producit substantiam. Prob. 3. quia si accidentia possent producere substantiam, tunc primis 4. qualitatibus competeret virtus effectiva omnium mixtorum sublunarium, per illarum dispositiones producendarum: sed hoc videtur esse supra virilitatem & activitatem accidentium: ergo.

Dico 3. accidens ut coniunctum cum substantia non videtur physicè producere substantiam. Prob. 1. quia substantia si ve causa principalis bene applicata, non videtur indigere instrumento physicè influente: ergo accidentibus secundum se ineptis malè attribuitur tanta virtus producendi specie diversissimas, & innumeras substantias. Prob. 2. quia licet substantiæ ad extra non operentur, nisi dispositionibus instructæ & applicatæ, nemo tamen dicit applicationem, si ve approximationem ignis, v. g. esse causam physicam, si ve physicè producere



cere effectum substantialem: ergo idem dicendum est de reliquis accidentibus. Prob. 3. quia licet materia prima non possit recipere formas substantiales sine dispositionibus, malè tamen inferretur formas partialiter recipi in dispositionibus: ergo præsentia, vel necessitas accidentium, quibus substantiæ excitatae operantur, non probant influxum physicum inadæquatum.

Ob. 1. plurimi dantur effectus substantiales, qui debent produci ab accidentibus, vel Deus non sufficientes produxit causas secundas effectibus naturaliter producendis, v.g. ranis aliisque insectis ex putri nascentibus, plantis ex terra inanimata, apibus ex mortuo bove, & pullis in furno ægyptiaco generatis; ubi nulla datur substantia creata horum effectuum productiva; ergo Deus voluit hos effectus ab accidentibus physicè produci. R. in eiusmodi casibus supplere Deum absentiam causarum secundarum, aliàs aptarum instar strenui ducis defectum militum, si res ita postulaverit, suppletis; sicut enim Deus effectus à subiecto independentes v.g. Angelos, animam rationalem, & materiam primam solus producit, sic dependentes quandoque, naturâ sic exigente, eò facilius producit solus, quò certius est, etiam juxta adversarios effectus plerosque à solo Deo conservari. Deinde



inde cum nulla causa secunda proportio-  
nata potuerit semper adesse casualibus di-  
spositionum concursibus, ideo nulla debe-  
bat ipsis provideri, nisi velis confugere ad  
solem vel aliam causam universalem, sal-  
tem partialiter tales effectus produ-  
centem.

Ob. 2. accidens non minus est propor-  
tionatum ad substantiam producendam,  
quam legatus ad negotia principis pera-  
genda; sed legatus est proportionatus:  
ergo etiam accidens; quia ad causam in-  
strumentalem sub nomine & virtute causae  
suae principalis operantem non requiritur,  
ut praecontineat formaliter vel eminenter  
perfectionem effectus, quia sicut causa su-  
stentativa juxta omnes non debet contine-  
re perfectionem effectus; sic causa instru-  
mentalis non debet: ergo. R. paritatem  
inter legatum & accidens factam esse nul-  
lam, quia legatus acquisita iurisdictione in  
certis punctis contrahendi fit melior; prin-  
ceps enim vel rex tantum est melior quoad  
iurisdictionem, sed accidens, nisi nova enti-  
tas addatur, tam parum redditur melius &  
magis activum, quam si caecus nomine vi-  
dentis, pignus nomine gigantis, vel unus  
miles nomine totius exercitus vellet vide-  
re, ferre pondus, aut hostem debellare. Pro-  
bationem disting. causa instrumentalis, vel  
susten-



sustentativa, non debent continere perfectionem effectûs, debent tamen adjuvari à cōcausa physicè influente nempe à principali, concedo: & se solis sine influxu alterius causæ perfectionem continentis, possunt producere effectum, nego: quia nomine substantiæ agere est titulus sine vitulo, nisi nova entitas vel realis virtus substantialis addatur accidenti substantiam producturo, sed sic solum accidens non producit substantiam: ergo.

Ob. 3. quævis creatura potest à Deo assumi ad quidvis producendum: ergo potest Deus accidenti indidisse talem virtutem productivam substantiæ. R. disting. antec. creatura potest quidvis producere per potentiam obedientialem, ut vocant, & cum Deo concedo; se solo, sive per virtutem propriam vel naturalem, nego antecedens & consequentiam.

*§. 5. An causa creata habeat spheram activitatis, & an possit agere in distans?*

**D**ico 1. in rebus creatis certa datur spheræ vel distantia activitatis, ultra quam operari non possunt, non tamen in omnibus eadem. Prob. 1. quia creaturæ habent limitē perfectionis, vel terminū: ergo etiam habent limitē operationis, quia operari se-

D

quitur



quitur ad esse. Probatur 2. ab experientia, quia aliqua substantiæ & qualitates sunt magis & in maiorem distantiam activæ, quàm aliæ; sol enim plus utique operatur, quàm Venus aut Mercurius &c; flamma latè diffusa plus efficit, quàm brevis facula. Dein dantur qualitates, quæ operantur circumcirca, ut calor, suffitus &c. Aliæ, quæ per lineam rectam operantur, ut lux, impulsus, & species visuales. Probatur 3. quia agens qualitates producit uniformiter difformiter, h. e. agens operando per spatium uniformiter sive semper decrescit, ut patet in candela pro ratione distantie, sicut noctu advertimus, minus lucis producente: agit etiam difformiter h. e. per palmos spatij decrescit inæqualiter, ut iterum constat ex duabus candelis in termino suæ activitatis collocatis, quæ, teste experientia, non æqualiter illuminant totum medium, quod utique fieret, si in quovis palmo spatij esset decrementum per æquales partes: ergo.

Dico 2. naturaliter non datur actio in distans, sive agens non potest naturaliter aliquid producere in passo, cui non est applicatum immediatè, vel per suppositum, hoc est, per entitatem causæ, vel per virtutem h. e. effectum saltem dispositivum vel concausam, Probatur 1. ex universalis iudicio



cio, quo noxiam aliquam impressionem ab extrinseco passi, putamus causam esse presentem, & ideo ex instinctu vel lumine naturæ determinati, fugam arripimus localem: ergo non datur actio in distans, aliàs à natura decepti, frustra fugeremus. Probatur 2. quia ad limitatam agentium naturam spectare videtur, ut non agant, nisi per medium, aliàs sequeretur ingens rerum confusio, & conflictus inter causas contrarias, se mutuò impedientes. Nec sciremus, an effectus à causa remota vel proxima esset productus. Probatur 3. quia experimur, causam pro diversitate applicationis magis vel minus operari, & quando neque per se, neque per virtutem est applicata, operari nihil. Hinc sol, clausis fenestrarum valvis, in cubili lucem producere non potest, impedità per murum & valvas solis applicatione. Probatur 4. quia si daretur actio in distans, assignari non posset certa agendi sphaera vel mensura, quia causa suam virtutem per medium non insumeret, integra post quamvis localem distantiam futura. Neque natura vitato vacuo tantopere omnium mundi partium desideraret conjunctionem, propter virtuosas qualitates ab agentibus per medium diffundendas, quia si daretur actio in distans, causa posset transi-



to medio effectum, quem vellet, producere.

Ob. 1. vis magnetica attrahit ferrum distans, & magnes rapitur versus stellam polarem. Succinum vel electrum attrahit paleas, torpedo, arrepto hamo, stupidum reddit brachium piscatoris, luscinia attrahitur in os serpentis, mustella in os bufonis, tympanum ex ovili pelle confectum dissolvitur ad pulsū tympani facti ex lupina, taurus ferociens ad ficum arborem alligatus mansuescit &c. ergo datur actio in distans. R. concesso antec. nego conseq. quia omnes allatae instantiae vel causae applicantur passo per virtutem aliquam, per medium diffusam, quam Philosophi vocant qualitatem insensibilem vel occultam, R. R. Medici profluvium, impressionem sive idam spiritūs h. e. formae substantialis, quae in medio sive in proximo passo plerumque propter diversam dispositionem materiae, & naturam qualitatis emissae ejusmodi effectus producere non solet, non secus ac fieri amat in calore non lutum, sed ceram liquefaciente, aut in praesentia felis etiam occultatae aliquibus hominibus nihil, aliis multum molestiae v. g. sudorem & delirium afferentis.

Ob. 2. unguentum armarium longissime abscentis vulnera curat, soli gladio aut  
strophio-



strophiole sanguine asperso applicatum, ut certissima testatur experientia: ergo datur actio in distans. Respondeo disting. anteced: curat physicè & ex propria virtute, nego, curat vel influit moraliter, vel ut conditio propter pactum, quod Paracelsus huius unguenti auctor (teste Schotto & aliis) dæmoni multùm familiaris fecisse dicitur, concedo. Nam sola experientia & foelix curatio non probat intentum, scilicet tantam huic unguento inesse virtutem sanandi, quia eodem jure quævis superstitiosa dici possent naturalia; nam schedâ Passavien- si devorata, caro indurescit ad quandam soliditatem, telis & glandibus imperviam. sic testatur experientia: eodem modo si sagæ suas ollas ebullire faciunt, coelum spissis nubibus implent, tam inflammato quàm frigidissimo impulsu tam diu altercantibus, donec furorem bene coctum cum ingenti pernicië in designatos effundât campos. Sic testatur experientia. Si saga equos, quibus utitur, ligneos consuetis illinat unguentis, sublimis effertur in auras eò, quò nocturnus traxerit conventus, volatura; sic testatur experientia. Si præstigiæ ex verbis, crucibus, herbis aut lapidibus adhibeantur, suum sæpe obtrinent effectum; sic testatur experientia. Quis propterea unquam ausus est dicere, ejusmodi rebus inesse naturalem



ralem virtutem taliū effētricem. Vnde iuculenter patet, quòd solā huius unguenti experiētiā plus non probetur, quàm dari aliquam causam vulnēri medentem vel nigram & suo auctori similem, vel candidam; sed si experiētia huic pharmaco nil amplius patrocīnatur, nulla superest ratio, nisi fortē dubiæ instantiæ, æquē obscuro calculo notandæ: ergo causa vulnēris physicē sanativa non est candida, siue unguentum non habet virtutem à Deo acceptam remota vulnēra sanandi.

## D E C A V S A I N C R E A T A.

*§. 1. An causa prima, siue Deus naturaliter possit demonstrari?*

**D**ico 1. Deus naturaliter demonstrari potest. Prob. 1. ex lumine naturæ, & dictamine rationis, ac communi iudicio hominum in necessitatibus suis ad unum Deum confugientium. Certē quilibet intellectus iudicat, esse dignissimum, ut sit ens carens omni defectu, siue, ut sit ens habens omnem & puram perfectionem: & simul quævis voluntas inclinatur ad optandum, ut detur tale ens: ergo tale ens non



debet esse impossibile: ergo defacto datur: quia si tale ens necessario existens sit possibile, utique dabitur: ergo. Prob. 2. quia datur ens productum; ergo improductum antecedit: quoad plurima est physicè, & quoad aliqua est metaphysicè evidens. Conseq. prob. nempe dari ens improductum, quia quidquid est productum, est ens ab alio, v. g. filius à patre, pater ab avo, & sic deinceps: ergo debet dari aliquod primum, quod à nullo existit, & habet omnem perfectionem communicabilem; si enim non haberet illam, non posset producere, quia nemo dat, quod non habet: ergo. Prob. 3. quia datur ens contingens, sive contingenter existens, ut sunt creaturæ: ergo debet dari ens à se, vel existens necessario; quia ens contingens est indifferens, & indifferens ad existendum non potest esse sui ipsius determinatio ad existendum; aliàs esset, & non esset indifferens: ergo debet aliunde determinari, nimirum ab ente necessario: ergo si datur ens contingens, debet dari ens necessarium. Prob. 4. vel confirmatur: quia si non daretur Deus, vel ens à se, tunc vel admittenda foret mutua causalitas quoad primum sui esse; sed hæc, ut suprà vidimus, propter evidentem contradictionem implicat; vel processus creaturarum in infinitum, quo etiam malè admissio adhuc



probat<sup>ur</sup> Deus, quia quævis creatura est contingens, & ab alio: ergo tota collectio est contingens & ab alio; creatura enim per accessum & additionem aliarum etiam infinitarum creaturarum, non desinit esse creatura: ergo omnes creaturæ sive tota collectio est ab alio: ergo debet dari causa prima vel Deus.

Ob. 1. illatio à sensu distributivo ad collectivum non semper valet: ergo, licet singulæ creaturæ scorsim sumptæ sint ab alio, non tamen sequitur, quòd tota collectio sit ab alio; sicut enim non sequitur; singuli lapides à Petro sunt portabiles, ergo omnes lapides simul sumpti sunt à Petro portabiles; ita non sequitur: singulæ creaturæ sunt ab alio, ergo omnes sive tota collectio est ab alio. R. omnibus certum, & evidens esse, aliquando valere illationem à sensu distributivo ad collectivum, sive aliqua prædicata, sicut verificantur de singulis aliqujus collectionis, ita verificari de tota collectione. Regula discernendi, utrum talis illatio valeat, vel non valeat? hæc potest assignari: quotiescunque prædicatum convenit singulis, quatenus habent negationem aliorum, tunc non valet illatio: hinc licet belli dux (idem dic de Petro quoad lapides) possit superare quemvis militem, intellige, quatenus opponitur toti collectioni,



Attoni, siue quatenus habet negationem reliquorum auxiliantium, non tamen valet illatio, ergo potest omnes &c. contra si prædicatum non convenit singulo, quatenus opponitur toti, vel quatenus habet negationem reliquorum, siue quando per accessionem plurium nec crescit, nec minuitur prædicatum, aut difficultas illius, tunc valet argumentatio à sensu distributivo ad collectivum: sed in nostro casu prædicatum Tò esse productum ab alio ita se habet, siue non minuitur per accessum alterius producti, quia produci sonat indigentiam sui, & beneficium alterius. sed hoc habet omnis creatura, siue sola & unica existat siue existant plures & infinitæ: ergo.

Ob. 2. Ex contingenti non potest sequi necessarium: sed existentia creaturæ est contingens; ergo ex creaturæ existentia non potest sequi vel probari necessarium: atqui Deus probatur ex contingenti existentia creaturæ: ergo Deus non potest probari, ut existens necessariò; sed si Deus non existit necessariò, tunc jam non est Deus, ergo. R. cum distinctione: ex contingenti non potest sequi necessarium, inferendo identitatem extremorum propter identitatem cum medio, concedo; inferendo propositionem absolutam ex conditionata, nego. Vel sic: ex contingenti non potest  
 D s sequi



sequi necessariū in syllogismo categorico, vel syllogismo recto, ita ut creatura sit medius terminus in recto positus, & inferatur hæc propositio: Deus existit; concedo; non potest sequi in syllogismo obliquo & composito, nego maiorem, & concessā minore, eodem modo sicut antè distingui debet consequ: ergo. Syllogismi, quibus Deus probatur, possunt esse sequentes: si datur creatura, datur Deus, sed datur creatura, ergo datur vel existit Deus: vel sic: si existit ens producens creaturam, tunc existit Deus: sed existit ens producens creaturam: ergo existit Deus. Prior syllogismus utitur hoc principio metaphysico; si aliquid est verum sub conditione, etiam verum est posita conditione: posterior regulatur illo noto principio metaphysico: quæcunque sunt eadem uni tertio &c.

Ob. 3. quanta est necessitas propositionis conditionatæ, tanta est propositionis vel veritatis absolutæ: sed creaturam existere, vel si creatura existit, existit Deus, est propositio contingens: ergo Deus existit (quæ est propositio absoluta) est contingens: sed qui tantum probat, Deum existere contingenter, non probat Deum: ergo. R. disting. mai. quanta est necessitas propositionis conditionatæ, tanta est absolutæ, si absolutæ necessitas pendeat à conditionata



ut à sua causa, vel à priori, concedo, si non pendeat ab aliqua, ut à sua causa, nego mai. & sic distincta min. nego conseq.

Instabis: si aliqua res pendet, vel probatur per ens contingens, tunc illa, non est certior quàm ens contingens, si ve illud contingens sit prius si ve posterius naturâ: sed Deus probatur per ens contingens, nempe existentiam creaturæ: ergo Deus non existit certiùs quàm creatura. Unde sequitur, Deum tantùm contingenter existere: mai. videtur esse certa, quia sol non existit certiùs quàm lux, forma materialis non est certior quàm subiectum, vel materia prima: ergo. R. disting. si aliqua res probetur per ens contingens, tunc illa non est certior, quàm ens contingens, si ita per illud probetur, ut non æquè probetur per ejus oppositum, concedo; si æquè per oppositum probetur, nego mai. & disting. min. Deus probatur per ens contingens, h. e. per existentiam creaturæ, ita ut æquè probetur per oppositum, h. e. contingentem negationem creaturæ, concedo, ut non probetur per possibilitatem, vel contingentem negationem, nego min. & conseq. Instantiæ, pro confirmatione majoris allatæ, nihil probant, quia sol non æquè pendet à negatione lucis, quàm ab ipsa luce: & forma non æquè pendet à negatione materiæ,



quàm ab ipsa materia: Deus verò æquè pendet vel probatur per contingentiam negationis, quàm per contingentiam limitatæ existentia; quia si datur possibilitas creaturarum, vel negatio contingens, tunc illa, quia est contingens, debet posse poni vel tolli, sed si potest poni vel tolli, tunc jam dabitur prima causa rerum possibilium productiva, & negationum sublativa: ergo Deus rectè probatur ex contingentia creaturarum.

*S. 2. An, & quomodo Deus immediate concurrat ad omnes effectus?*

**D**ico 1. Deus immediate concurrat ad omnes effectus, sive creaturas producendas. Ita Philos. & Theol. omnes contra Durandum. Probatur 1. ex S. script. Ioan. 1. omnia per ipsum, h. e. Deū, facta sunt, & sine ipso factū est nihil: ad Corinth. 12. qui operatur omnia in omnibus. Quòd autem facer text<sup>9</sup> loquatur de immediato cōcursu Dei, testantur SS. Patres, apud Suarez & alios citati. Probatur 2. quia si Deus non immediate concurreret, nō haberet perfectissimum dominium in creaturas; istas enim actiones & effectus, quos immediate non produceret, non posset immediate impedire aut destruere: Deus enim ad effectum impe.



impediendum, deberet vel agens, vel passum, vel utriusque approximationem destruere, vel aliquam qualitatem destructivam producere: sed hoc est contra supremum dominium Dei, qui ex mera sua voluntate & beneplacito debet operari, & suspendere posse omnes actiones creaturarum, sicut contigit in flammis babilonicis in tres pueros nihil agentibus, negato Dei concursu. Probatur 3. quia implicat creatura, quæ à Deo non immediatè pendeat: sed omnes actiones & effectus sunt creaturæ: ergo omnes immediatè pendent à Deo: maior videtur esse certa, quia omnis creatura est ens participatū, & essentialiter subiectum dominio Dei, & omnis creatura debet esse gloriosa Deo, commendans continuam, quamdiu existit, & indefessam omnipotentia divinae liberalitatem: ergo, sicut Deus est essentialiter & immediatè à se, sic decet, ut omnis creatura sit essentialiter & immediatè à Deo.

Dico 2. Deus cum causis secundis influat in effectum per eandem actionem. Probatur 1. quia actio creaturæ est insufficiens ad aliquid producendum, nihil enim possumus ex nobis: ergo. Probatur 2. quia omnis creatura immediatè producitur à Deo, propter summum Dei dominium, & subjectionem creaturæ: sed omnis actio crea-



creaturæ est creatura : ergo omnis actio creaturæ immediatè producitur à Deo. Probatur 3. quia eadem actio potest procedere à diversis causis creatis in eundem effectum influentibus ; sicut enim eadem actio essentialiter respicit causam & effectum . sic respicere potest causam primam & secundam , ergo non est ratio , cur Deus non influat per eandem actionem. Probatur 4. quia si actio Dei & creaturæ essent diversæ & realiter distinctæ, idem effectus generaretur & crearetur : actio Dei esset creatio ; Deus enim se solo nihil potest educere ; actio verò creaturæ esset generatio , quia modus creandi non competit creaturis.

Ob. 1. Causæ secundæ sæpe adæquant, imò superant in perfectione suos effectus : ergo immediatus Dei concursus non est necessarius. R. concesso antecedente , distinguo consequens, immediatus Dei concursus non est necessarius ratione perfectionis saltem specificæ, concedo ; non est necessarius ratione creaturæ , essentialiter exigentis dependere ab actuali exercitio liberalitatis divinæ, nego.

Ob 2. ad rationem creaturæ & dominium Dei non requiritur , ut creatura pendeat à Deo, ut causa ; sed satis est, si pendeat à Deo, ut conditione, nempe à permissione & volitione divina ; ergo Deus non immediatè



diatè physicè concurrit ad omnes effectus. Sed contra est 1. quia creatura debet à Deo dependere summo & perfectissimo modo; sed plus est à Deo tanquam à causa dependere, quàm tantùm à conditione. 2. quia non potest ostendi officium huius conditionis; volitio enim divina nihil agit, sed tantùm applicat omnipotentiam ad cooperandum: ergo præter volitionem vel nolitionem debet Deus, ut agat, addere influxum immediatum, vel, ut impediat, debet immediatum influxum subtrahere. 3. quia sic effectus deficiente causâ secundâ tam parùm immediatè conservaretur à Deo, quàm artefactum ab artifice, quod tamen est contra Durandum, & reliquos omnes, saltem Catholicos.

Ob. 3. si Deus per eandem actionem influit, tunc eadem actio potest esse immanens & transiens, vitalis & non vitalis, universalis & particularis, sed hoc videtur esse absurdum: ergo. R. disting. mai. eadem actio, quâ Petrus v. g. cum Deo suam cognitionem producit, erit talis respectu diversorum principiorum inadæquatè concurrentium, concedo; respectu eiusdem principij nego. Actio productiva cognitionis creatæ respectu Petri est immanens, vitalis, particularis, respectu Dei est transiens, non vitalis & universalis, quia Deus actionem



nem non recipit, & concurrit influxu omnibus agentibus creatis communi, propter rationem creaturæ, vel entis limitati, ergo respectu Dei dicitur actio, transiens non vitalis & universalis.

*§. 3. An omnes creatura conser-  
ventur à Deo, & an elevari possint ad  
quidvis producendum, vel  
creandum?*

**D**ico 1. sicut Deus omnes creaturas pro-  
ducit, sic per influxum realem conser-  
vat: ita omnes, saltem Catholici. Proba-  
tur 1. quia creatura se habet respectu Dei,  
sicut lux in aëre respectu solis, sed talis lux  
conservatur à sole; sole enim remoto, nec  
per momentum subsistere potest: ergo.  
Probat 2. quia creatura est insufficiens ad  
se conservandum; conservatio enim nihil  
est aliud, quàm continuata productio, sive  
est actio præsupponens aliam actionem  
eiusdem termini productivam: ergo. Pro-  
batur 3. quia si creatura non conservaretur  
à Deo, saltem partialiter, tunc Deus in hanc  
creaturam non haberet absolutum & perfe-  
ctum dominium; illam enim non posset  
Deus immediatè destruere, quia prius de-  
struenda foret causa talis creaturæ conser-  
vativa:



vativa : sed hoc est contra rationem entis participati sive creaturæ, ut vidimus supra : ergo.

Dico 2. Deus creaturam elevare potest ad quidvis producendum, imò ad creandum, nisi obftet specialis repugnantia. Sic communis. Probat 1. quia anima rationalis utiq; potentia naturalis non tantum sustentat actus meritorios supernaturales, sed illos (ut docet Trident. sess. 6. can. 4.) activè, & liberè producit : deinde piscina probatica potuit physicè sanasse quoscunque infirmos : lutum & sanctissima Christi saliva potuit cæco nato dedisse potentiam videndi : sacramenta novæ legis physicè producere possunt gratiam sanctificantem : ergo quævis creatura potest elevari ad quoscunque alios effectus producendos. Probat 2. quia hæc elevatio est gloriosa Deo, Sanctos propter excellentiam virtutis ad patranda miracula elevanti; non tantum, ut causas morales, & meritorias, sed etiam ut causas physicè influentes ; sagis econtra mirabiles suos effectus non physicè, sed tantum moraliter causantibus. Probat 3. quia spectat ad perfectionem Dei, posse operari perfectissimè cum quovis instrumento ; quò enim nobilius est agens principale, eò viliore potest uti instrumento ; ergo potest Deus per indebitum & specialem



cialem concursum in consortium adlegere quamvis creaturam ad quidvis generandum vel creandum. Probatur 4. quia causa naturalis perfectior potest elevare imperfectiorem, v. g. anima potest elevare species impressas ad actus vitales efficiendos: ergo Deus tanquam causa principalis potest supplere imperfectionem instrumenti, vel per auxilium intrinsecum, sicut contingit in anima rationali per gratiam & habitus supernaturales elevatâ ad effectus altioris ordinis producendos; vel per auxilium merè extrinsecum, assistente Deo per fortio-rem influxum, quia ut creatura physicè producat effectum qualemcunque, plus non requiritur, quàm ut actio productiva effectûs essentialiter, immediatè & determinatè respiciat creaturam, sed nulla apparet ratio, cur Deus non possit per talem actionem ita respectivam producere effectum: ergo.

Ob. 1. artifex humanus suum opus productum non debet conservare: ergo idem dici debet de Deo suas creaturas producente. R. concessio antecedente, nego consequentiam & paritatem: quia Deus propter absolutissimum dominium, & infinitam virtutem (quæ operando fatigari non potest) & propter indispensabilem, atque immediatam subjectionem creaturæ semper debet



debet concurrere ; sicut enim nihil potest produci sine Deo , sic sine illo nihil debet conservari. Artifices verò limitati, quia fatigantur & impediuntur ab aliis actionib<sup>9</sup>, debent posse aliqua usui humano necessaria producere sine ulteriore operatione conservativa, ergo.

Ob. 2. si quævis creatura per indebitum concursum potest elevari ad quidvis producendum, tunc oculus potest causare auditionem, & lapis visionem : sed hoc videtur absurdum, quia sic lapis videret, & oculus audiret. Respondeo, licet lapis cum principio vitali possit producere visionem, & oculus auditionem, non tamen sequitur, quòd oculus audiat, & lapis videat, quia denominatio audientis & videntis est effectus formalis, coalescens ex forma & subiecto apto vel capaci: sic licet lumen gloriæ, & species impressæ concurrant ad actus vitales, per illos tamen non denominantur vivere; eodem modo, licet lapis reciperet gratiam sanctificantem, & Angelus albedinem, lapis tamen propterea non rectè diceretur gratus, nec Angelus albus.

Ob. 3. soli Deo proprium est producere, quidquid non implicat: ergo creatura non potest elevari ad omnia producenda; aliàs creatura esset omnipotens. R. cum distinctione: soli Deo proprium est produ-

cere,



cere, quidquid non implicat, per virtutem propriam, vel per potentiam positivam, concedo; per alienam virtutem vel per potentiam merè negativam, sive per non repugnantiam, nego antecedens & consequentiam. Nec propterea creatura est omnipotens, præsertim cum elevari non possit ad seipsam primò producendam, neque ad actiones aliarum causarum. Deinde posset fortè dari actus fidei supernaturalis de se judicans, se non posse ad omnia producenda elevari. Hic actus, cum essentialiter sit verus, propter prædicatum in se reflexivum, haberet contractam potentiam, vel impotentiam obedientialem.

*§. 4. An Deus causas secundas physicè prædeterminet ad operandum?*

**D**ico, Deus causas secundas physicè non prædeterminat, h. e. Deus causis liberis in actu primo non infundit talem qualitatem, quæ tanquam complementum virtutis activæ infallibiliter secum trahat effectum. Sic communissima contra Thomistas. Hæc conclusio à Theologis probari solet ex S. scriptura, Conciliis, SS. Patribus, & ex ipso S. Thoma; nos his omissis rationes afferemus. Itaque probatur, quia causa



sa necessaria omnibus aliis ad agendum requisitis instructa, non indiget qualitate superaddita prædeterminante; ergo neque causa libera sic instructa indigebit; eo ipso enim, quòd sit libera & expedita, seipsam per actuale exercitium libertatis determinare potest: ergo. Probatur 2. quia sic illi, qui peccant, non haberent auxilium sufficiens ad peccata evitanda: vel enim carent qualitate prædeterminante, vel non carent; si carent, tunc causa libera juxta Adversarios non est sufficiens & proximè potens operari, si non carent, tunc non peccant, qualitate infallibiliter oppositum effectum secum trahente. Probatur 3. quia concursus prævius, vel præmotio physica tollit libertatem; tollit enim indifferentiam ad agendum; ergo non potest admitti. Antecedens probatur, quia apud omnes certum & indubitatum est, ad essentiam causæ liberæ requiri, ut omnibus positis ad agendum prærequisitis, & stantibus illis (adeoque in sensu composito) possit agere & non agere; sed posita prædeterminatione physica efficaciter & infallibiliter voluntatem ad agendum trahente, causa aliàs libera, non potest agere, & non agere: ergo posita & stante prædeterminatione physica, causa non est libera. Cōfirmatur: quia ideo lumen gloriæ & visio intuitiva Dei in beatis tollit liber-



tatem, quia visio intuitiva est ex parte actûs primi, & beatos infallibiliter determinat ad amandum Deum: sed præmotio vel prædeterminatio physica est ex parte actûs primi, siue pro priori signo naturæ, & hominem infallibiliter determinat ad effectum: ergo præmotio tollit libertatem. Probat<sup>ur</sup> 4. quia admissâ hâc prædeterminatione, si detur adhuc peccatum, tunc Deus est auctor illius, ut voluit Calvinus à Concilio Tridentino damnatus: sequela probatur, quia Deus causas secundas præmovet, vel prædeterminat ad omnes & singulas actiones, ut fatentur Adversarij: ergo etiam ad actum intrinsecè malitiosum, v. g. ad blasphemiam & odium Dei; ergo Deus, vel ille est auctor peccati, qui creaturam maligna qualitate fascinatam, nolentem volentem, efficaciter & infallibiliter rapuit ad peccatum, ut dixerat Calvinus; ergo Deus est auctor peccati, vel non datur prædeterminatio physica.

Obijcies 1. omne agens secundum, essentialiter subordinatur primo, & ab illo non tantùm dependet in esse entis, sed etiam in ratione operationis; ergo debet ab ente primo physicè prædeterminari, quia Deus, affirmante Philosopho, est primus motor immobilis, & omne, quod movetur, movetur ab illo; ergo. R. concessio antecedente,



cedente, nego consequentiam: ad probationem dico: Deum recte dici primum motorem immobilem, quia ens est à se, à quo reliqua omnia producuntur, & quatenus dat illis virtutem motricem, & sine illius simultaneo influxu moveri non possunt, rectè ab illo omnia moveri dicuntur.

Obijcies 2. Deus est causa prima, vel principium primum agens: ergo debet prævio influxu, sive præmotione physica causam secundam determinare, quia, ut S. Thomas loquitur 1. secundæ, q. 3. a. 2. voluntas nostra ad suum actum se habet, ut mota, Deus verò, ut movens. R. distinguo antecedens: Deus prius agit ex multis titulis. 1. prioritate dignitatis. 2. naturæ, quia producit causam secundam, & cum illa causat effectum. 3. prioritate Logica, vel illationis; valet enim consequentia: operatur creatura, ergo Deus, sed non vicissim, concedo antecedens: prius agit in sensu Thomistarum, nego antecedens & consequentiam. Ad ultimum dico, quòd S. Thomas nihil aliud intellexerit, quàm quòd causa secunda non possit agere, nisi prius mota, h. e. adjuta & instructa gratiis excitantibus, cognitionibus & illuminationibus, quas Deus suæ creaturæ subordinatæ immittere potest pro libitu.

Obijcies 3. licet prædeterminatio physica



sica tollat libertatem, vel indifferentiam potentialem sive habitualement, ut loquuntur Thomistæ, quæ consistit in eo, quod voluntas non magis inclinetur ad unam quam alteram partem, cum suspensione & privatione omnis actûs, non tamen tollit indifferentiam actualem; quia prædeterminatio est motio quædam sive influxus per modum transeuntis, receptus in causa secunda, seque accommodat genio & conditioni causæ secundæ. Causam necessariam quidem determinat per modum naturæ, h. e. hanc causam non tantum facit operari infallibiliter, sed etiam necessariò, sine potentia ad oppositum: causam verò liberam determinat per modum liberi, h. e. facit illam agere infallibiliter quidem, sed liberè & cum potentia (in sensu diviso) ad non agendum, vel agendum oppositum. Iuxta aliquos Thomistas hæc prædeterminatio dicitur esse qualitas virtuosa se tenens ex parte actûs primi: juxta alios dicitur esse mera applicatio causæ secundæ, quoad actum secundum essentialiter subordinatæ, & per talem præmotionem dependentis à causa prima. Respondeo: licet præmotio physica sit influxus transiens, & fluens cum ipsa operatione ad quam datur, & se quomodocunque insinuet genio causæ secundæ, quia tamen independenter à causa

sa



**C**a secunda datur, infallibiliter secum trahens & producens operationem causæ secundæ, ideo tollit libertatem vel indifferentiam actualem causæ secundæ, quia posita & stante prædeterminatione physica tam parum homo viator est indifferens vel liber ad agendum vel non agendum, quàm beatus in cœlo stante visione intuitiva Dei sit liber vel indifferens ad amandum Deum.

Instabis: actualis determinatio non tollit libertatem, vel actualem indifferentiam: sed prædeterminatio physica est actualis influxus vel determinatio: ergo non tollit libertatem vel actualem indifferentiam. R. distinguo maiorem: actualis determinatio non tollit libertatem respectu sui, & suæ causæ liberæ, concedo; non tollit libertatem quoad effectum infallibiliter secuturum, nego maiorem: & transmissa minore, distinguo consequens: prædeterminatio actualis non tollit libertatem ratione ponentis prædeterminationem, concedo consequentiam; ratione creaturæ præmotæ, vel quoad operationes creaturæ, quas prædeterminatio causat vel infallibiliter secum trahit, nego consequentiam: nam sicut visio beatifica est actualis determinatio, & tamen necessitat ad amorem Dei; & sicut volitio humana, licet sit  
E actua-



actualis & libera determinatio, tamen necessitat voluntatem ad speciem sui producendam; sic prædeterminatio, quia est prior naturâ, & infallibiliter secum trahit operationem creaturæ, ideo necessitat creaturam; prædeterminatio enim non est operatio, vel actuale exercitium causæ secundæ, sed est aliquid præsuppositum necessitans, & hoc admissio creatura non potest agere, & non agere, sed debet agere: hoc verò ablato, creatura non est potens agere; ergo Thomistæ, dum volunt causam liberam reddere potentem vel in operando dependentem, faciunt necessariam,

*§. 5. Per quale decretum Dei applicetur omnipotentia ad effectus producendos?*

**S**Uppono 1. Omnipotentiam Dei non exire in actum, sive non esse expeditam ad effectum producendum, nisi applicetur per aliquod decretum Dei.

Suppono 2. Deo communiter duplicem, vel triplicem attribui scientiam, scilicet necessariam, vel scientiam simplicis intelligentiæ, & contingentem, sive scientiâ visionis, & scientiam conditionatam, vel mediam. Scientia simplicis intelligentiæ est



est illa, qua Deus cognoscit omnium rerum essentiam & possibilitatem, h. e. quid & quomodo in quavis circumstantia aliquid sit possibile. Scientia visionis dicitur illa, qua Deus cognoscit omnia præsentia, præterita, & futura. Scientia denique media, vel conditionata est, qua Deus cognoscit, quid futurum esset, si istæ vel istæ conditiones ponerentur, quæ conditiones, vel circumstantiæ, quia nunquam ponentur, ideo futuritio talium effectuum nunquam subsequetur; sic Deus vidit Davidem hosti tradendum, si Ceilæ mansisset; sic multi immaturâ morte sublatis sunt, ne malitia mutaret intellectum.

Suppono 3. In Deo dari unicum decretum liberum 1. quia Deus antecedenter ad omne decretum liberum habet scientiam mediam de omnibus eventibus, & combinationibus; ergo Deus omnia simul decernit. 2. quia Deus quoad omnes creaturas producibiles, quæ sunt objectum materiale, vel terminativum, unicum habet motivum vel objectum formale, nempe suam bonitatem infinitam. 3. quia, quò perfectius est principium cognoscitivum, cò plura unico actu indivisibili attingit: ergo, cum modus cognoscendi & volendi in Deo sit perfectissim<sup>9</sup>, Deus omnia simul volet vel repudiabit.



Dico 1. Deus suam omnipotentiam ad operandum non applicat per decretum confusum, sed tantum extendens ad actum in communi, 1. quia realiter nullus possibilis est effectus, vel actus genericus: & quia Deus sic indifferenter concurreret ad actum bonum & malum, auctor utriusque futurus. 2. nec per decretum absolutum, & antecedens omnem productionem effectus, quia cum tali decreto tam parum stare posset libertas, vel indifferentia voluntatis creatæ, quàm cum prædeterminatione physica, antè refutata; nam posito tali decreto ad unum determinato, voluntas creata non posset ea facere, quæ omittit, destituta parato Dei concursu ad ea facienda. Deinde hoc decretum esset inimpedibile, pro priori signo naturæ positum, & infallibiliter trahens effectum: ergo. 3. Deus suam omnipotentiam non applicat per decretum merè & formaliter conditionatum, quo Deus dicat: volo concurrere, si voluntas creata voluerit, quia tale decretum supponit, quasi creatura possit velle sine concursu Dei, deinde quia voluntas purè conditionata, quamdiu manet conditionata, est inefficax, & nunquam positura effectum, vel actualem concursum. Tandem, quia sic Deus supposito, quòd actio Dei & creaturæ sit eadem, per decretum diceret; volo concurrere



currere, si voluero concurrere. 4. non per decretum merè & proximè indifferens ad disjuncta, quia voluntas merè indifferens ad disjuncta, non habet effectum, sed voluntas, qua Deus proximè hîc & nunc applicat suam omnipotentiam, habet effectum determinatum, ad unam partem disjunctionis : ergo voluntas, vel decretum Dei non potest esse merè vel proximè indifferens ad disjuncta, aliàs, si æqualiter terminaretur ad disjuncta, tunc vel poneret nihil, vel utrumque effectum contradictoriè oppositum : ergo Deus suam omnipotentiam non applicat per decretum merè indifferens, vel disjunctivum.

Dico 2. Deus suam omnipotentiam proximè applicat per decretum absolutum, & æquivalenter conditionatum, & disjunctivum v.g. volo, concurrere cum homine ad actus bonos A B C, vel malos etiam certos, illos desiderans, istos detestans, nihil tamen addendo, vi cuius ad alterutrum determinetur. Vel sic : quia vidi per scientiam mediam, quòd creatura libera in istis & istis circumstantiis posita eliceret actum bonum, suo tempore statuo vel decerno tales circumstantias ; si verò actus, quem Deus prævidet, sit peccaminosus, ita Deus decernit : licet videam, Petrum, si in istis circumstantiis positus haberet



beret talem illuminationem, socios &c. esse peccaturum, & licet ille actus peccaminosus sit contra meum votum, consilium, vel expressum mandatum, cum Petro tamen in istis circumstantiis constituto concurrerem ad peccatum, libentiùs ad oppositum concursurus: prius decretum vocari solet prædefinitivum, posterius verò quoad actus malos permissivum. Bonitas conclusionis habetur ex eo. 1. quia sic dissidentium auctorum sententiæ conciliantur. hoc decretum est antecedens, absolutum, & determinatum, sed non simpliciter, quia pendet à conditionata prævisione illorum effectuum, quos voluntas creata liberè est factura. 2. quia sic non tollitur libertas humana, cum decretum illius exercitium prævisum ut conditionem præsupponat 3. quia sic decretum Dei non est inefficax, cum absolutè dicat: volo concurrere, ita tamen ut voluntas creata possit agere & non agere. Adeoque hoc decretum Dei pro objecto habet duas partes; unam positivam, & alteram negativam. Positiva sunt actus boni & mali, & eorum productio vel actualis concursus ad illos: negativa est negatio principii necessitantis vel prædeterminantis.

Obijcies 1. ante decretum prædefinitivum debet dari aliud decretum; ergo non



datur unicum decretum hactenus assignatum: antecedens probo, quia creatura non potest operari sine decreto omnipotentiam Dei applicante, sed ante decretum prædefinitivum per scientiam mediam videt Deus, quòd creatura in istis & istis circumstantiis esset operatura: ergo debet ibi dari prævium aliquod decretum ad operandum prærequisitum. R. concesso antecedente, distinguo consequens: non datur decretum unicum liberum nego, & debet adhuc præsupponi necessarium, concedo. Deus enim, dum per scientiam simplicis intelligentiæ videt rerum possibilitatem, utique videt, quòd actus bonus & malus non sit possibilis, nisi dependenter à sua omnipotentia per aliquod decretum applicata: ergo, ut Deus videre possit eventum operationis, debet obtulisse paratum concursum ad actus oppositos, nempe ad agendum, & non agendum.

Obijcies 2. implicat, Deum habere actum abstractivum, & non omniscium: sed decretum Dei ante scientiam mediam positum esset actus abstractivus, vel non omniscius, quia adhuc non sciret eventum; ergo implicat. R. licet decretum illud disjunctivum, ut salvari possit libertas humana, sit formaliter abstractivum à determinata futuritione creaturæ, realiter tamen



cum sit identificatum cum scientia media, non abstrahit. Sed de hoc viderint Theologi.

*§. 6. Andetur series effectuum,  
& an Deus determinet ad in-  
dividuum?*

**D**ico 1. non datur series vel ordo intrinsecus, inter causas & effectus, h. e. certæ circumstantiæ loci, temporis, dispositionum, subjecti agentis &c. ex natura sua non sunt connexæ cum uno certo effectu individuali, naturaliter tantum producendo: sed Deus potest ligno, v. g. ad ignem disposito sine violentia aut miraculo producere quodlibet aliud ignis individuum. Probat. 1. quia omnia individua, in una specie contenta, sunt eiusdem rationis, & æqualiter serviunt ad finem causæ efficientis, sive ad speciem propagandam: ergo causa efficiens tam parum est connexa, ex infinitis possibilibus, cum certo individuo, quàm materia prima cum determinata forma substantiali, omnibus & singulis formis æqualiter appetitum materiæ satiantibus. Probat. 2. quia nulla est necessitas talem seriem admittendi, & Deo magis est gloriosum, si sub iisdem circumstantiis producere possit



possit multa, quàm unicum tantùm individuum. Probat 3. quia, si daretur series effectuum, tunc animæ rationales (idem dic de cæteris formis) inter se specie distinguerentur, sed hoc dici non potest: ergo. Sequela probatur: quia illa differunt specie, quæ ad sui productionem exigunt diversis. firmas circumstantias, dispositiones, accidentia, sed animæ rationales. si datur essentialis connexio, vel series rerum, ita se habent, h. e. exigunt diversas mundi plagas, diversa anni tempora, diversa corporis temperamēta, diversos parentes &c. ergo specie non minùs distinguuntur; quàm durationes & ubicationes, quæ sunt diversæ classis, vel quæ connectuntur cum diversis extremis. Probat 4. quia si admittitur ordo intrinsecus vel series rerum, tunc anima in Europa, à Catholicis parentibus procreata, non potuisset æquè produci in India per Ethnicos genitores: imò isti characteres, vel vocabula, quos nunc scribo, non potuissent connaturaliter heri, vel in alio loco à me fieri propter diversas loci saltem & temporis circumstantias; sed hoc videtur absurdum, & contra communem fidelium sensum, Deo gratias agentium, quod in locis & parentibus Catholicis sint nati: ergo non datur series rerum.

Dico 2. Deus vel causa prima determinat



nat causam secundam ad individuum effectus. Prob. 1. quia causa secunda, licet se determinet ad speciem effectus, est tamen indifferens, an hoc potius, quàm illud ponatur individuum: causa enim creata cum effectu individuali non connectitur per se, neque per dispositiones, nec per circumstantias loci, & temporis, ut vidimus: ergo. Probatur 2. quia causa secunda individua clarè non cognoscit, & in illis omnino similibus non apparet specialis bonitas voluntatem alliciens, & semper infinita sunt possibilia: ergo rectius dicitur causas secundas tam liberas, quàm necessarias ad individuum actus determinari à Deo. Probatur 3. quia Deus ad cooporandum applicat suam omnipotentiam per decretum absolutum, & determinatum in scientia media fundatum, ut vidimus: ergo Deus determinat ad certum individuum.

Ob. 1. Ecclesiastici 7. dicitur: honora patrem tuum, & gemitus matris tuæ, ne obliviscaris; memento, quoniam nisi per illos, natus non fuisses: ergo datur series vel connexio parentum cum filiis. Respondeo 1. textum S. scripturæ loqui de statu moderno, nempe juxta decretum Dei jam factum quia omnes filii debent honorare parentes, etiam illi; non juxta seriem (ut farentur adversarij) sed miraculosè ex  
cer.



certis parentibus nati. Respondeo 2. Textum sacrae scripturae etiam verum esse, quoad temperamentum, & constitutionem hominis accidentalem, utique multum à circumstantiis pendentem.

Ob. 2. ordo creaturarum per se est melior, quàm ordo per accidens, ergo causa certis circumstantiis vestita per se, vel suâ naturâ connectuntur cum suis certis effectibus. Respondeo, distinguo antecedens: ordo per se, qui nulla affert incommoda, concedo; qui affert, nego antecedens & consequentiam; sicut enim adversarij rectè negant, dari seriem in causis liberis quoad speciem actûs, ne tollatur libertas, sic nos negamus dari ordinem intrinsecum. quoad individua, ne tanta individuorum detur diversitas, & restrictio omnipotentiae divinae, in certis circumstantiis ad unicum individuum alligatae: deinde si datur series rerum in productione, tunc etiam dabitur in destructione, quod videtur absurdum, ergo.

Ob. 3. Causa secunda determinat ad speciem actûs v. g. Petrus eligit actum peccaminosum, quem Deus detestatur: ergo causa secunda etiam determinat ad individuum actûs; species enim & individuum, siue gradus metaphysici realiter non distinguuntur: ergo causa secunda determinat



nans ad speciem, determinat ad individuū, adeoque Deus malè dicitur determinare ad individuum. Respondeo, concessio antecedente, distinguo consequens, causa secunda determinat ad individuum realiter, h. e. cum Deo realiter producit individuum, sicut Deus cum causa secundā realiter producit speciem, concedo consequentiam, causa secunda determinat formaliter h. e. causa secunda ex infinitis individuis prorsus æqualibus eligit unum præ alio nego consequentiam: itaq; creatura ideo dicitur determinare ad speciem, quia ex duobus actibus diversæ rationis, eligit unum, altero relicto, v. g. malum relicto bono, e contra ideo Deus determinare dicitur ad individuum, quia ex duobus vel pluribus actibus ejusdem naturæ aut rationis eligit actum A pro actu B, causā secundā quovis omnino simili individuo contentissimā.

§ 7. *An Deus physicè influat in actum peccaminosum, & an sit causa peccati?*

**D**ico 1. Deus physicè influat, non tantum in substratum malitiæ, vel prædicatum materiale peccati, sed etiam in actum  
vita-



vitalem physicum, intrinsecè & inseparabiliter malitiosum, v. g. in odium Dei, re-  
 ctitudinis moralis essentialiter exclusivum  
 Probatur 1. quia Deus (ut suprà vidimus)  
 physicè influit in omnes effectus; ergo  
 etiam in actum peccaminosum. Probatur  
 2. quia, si Deus nollet influere, tunc negato  
 concursu divino tolleretur indifferentia &  
 libertas, ut diximus suprà.

Dico 2. Deus non est auctor, vel talis  
 causa peccati, cui malitia peccati possit im-  
 putari. Sic Catholici omnes. Probatur 1.  
 quia ille est auctor peccati, qui directè, per  
 se, positivè, h. e. cum inclinatione, & pro-  
 pensione peccati influit, vel saltem non im-  
 pedit, quando tenetur: sed Deus ita non  
 influit; ergo Deus non est auctor peccati.  
 Major videtur esse certa: minorem probo,  
 quia Deus offerens concursum ad actus op-  
 positos, inæqualiter tendit in bonum &  
 malum, bonum enim desiderat, præci-  
 pit, æternum præmiaturus: malum verò  
 detestatur, prohibet, cum poenæ commina-  
 tione: ergo Deus non influit positivè, direc-  
 tè & per se, ergo non est auctor peccati. Pro-  
 batur 2. quia, si Deus creaturæ rationali ve-  
 lit ingens libertatis bonum concedere, ad  
 se liberè & meritoriè amandum, tunc de-  
 bet ut auctor naturæ concurrere ad actus,  
 quoscunque etiam peccaminosos; alias



creatura non esset libera, Deo in actu secundo nolente concurrere; ergo Deus non est simpliciter & per se causa peccati, sed tantum per accidens.

Obijcies 1. Deus physicè influit in formalem malitiam peccati: ergo Deus æquè est causa, quàm homo. R. distinguo antecedens: Deus influit per se cum propensione innata, vel elicitâ, nego antecedens; influit per accidens cum aversione, concedo antecedens, & nego consequentiam: quia sicut sacerdos Eucharistiam ministrans, occulto peccatori, quem privatâ notitiâ scit esse in malo statu, non peccat, (idem dic de mutuatario in gravi causa vel necessitate, mutuum ab usurario petente) sic Deo peccatum imputari non potest.

Ob 2. peccatum est summum malum, & Deus illud summè odit: ergo Deus non potest concurrere ad peccatum producendum, quia si concurrat, tunc magis odit negationem libertatis humanæ, quàm peccatum; Deus enim negationem libertatis creatæ determinatè non vult, quia se solo ponit libertatem creatam, negationem verò peccati tantum vult disjunctivè, prout se creatura ad illam vel eius oppositum liberè determinaverit, ergo Deus magis odit negationem libertatis, quàm peccatum. Respondco, concessio antecedente, nego consequentiam.



quentiam : probationem distinguo : Deus magis odit negationem libertatis creatæ, quàm peccatum determinatè ponendum, nego : quàm disjunctivè ponendum, concedo : Deus enim determinatè per se solum, & ex sua inclinatione nunquam potest ponere peccatum, potest tamen ponere, & ponit defacto negationem libertatis, v. g. in amentib⁹ & infantib⁹. Dein Deus potest ex libera creaturæ malitia peccatum permittere, quia Deus, ut S. Augustinus loquitur, maluit de malis bene facere, quàm mala non permittere.

Obijcies 3. actus indifferenter volens concurrere ad bonum & malum, non est actus honestus : sed Deus habet talem actū, quando in actu primo cum voluntate creata applicat suam omnipotentiam ad concursum disjunctivum : ergo Deus est auctor actūs non honesti, sive peccaminosi. Respondeo, distinguo maiorem : si sit actus æqualiter tendens in bonum & malum, vel si id fiat ex levitate & cum propensione, concedo maiorem : si inæqualiter, & ex officio ita fiat, ut concurrens optet actum bonum, & malum detestetur ac dissuadeat, nego maiorem, & sic distincta minore, nego consequentiam.

Obijcies 4. non creatura, sed Deus determinat ad individuum : ergo Deus est causa



causa peccati : Respondeo, distinguo antecedens, Deus determinat ad individuum decreto simpliciter antecedente & absoluto, nego antecedens : decreto dependente à scientia media, concedo antecedens, & nego consequentiam : quia supposito, quòd voluntas creata se determinet ad odium Dei, non est specialis malitia in hoc potius odio, quàm illo, cùm sint eiusdem rationis ; sicut enim supposita determinatione dandi aureum in eleemosynam, non est specialis honestas in eo, quòd eligam hunc potius aureum, quàm illum, illi & reliquis omnino similem, sic non est specialis malitia in eligendo hoc individuum, reliquis in suo nihilo relictis.

*§. 8. An Deus sive causa prima  
necessitetur ad optimum faciendum ?*

**D**ico. Deus, nulla facta suppositione rei positæ, aut per decretum ponendæ, non necessitatur ad optimum faciendum. Probat 1. quia Deus est infinite perfectus, liber, & felix per seipsum sine omni creatura : ergo non necessitatur ad illam faciendam. Probat 2. quia creatura quantumvis perfecta, Deum non facit perfectiorem ; finis  
tum



rum enim additum infinito nihil habet æstimabilitatis: præsertim, cum omnis æstimabilitas entis creati, vel finiti eminenter & infinites contineatur in Deo, tanquam in ente infinito. Probat<sup>ur</sup> 3. quia in Deo nulla est indigentia vel defectus, nec infert sibi violentiam, si nullam producat creaturam. Sic testatur communis sensus fidelium gratias agentium, quod Deus se & hoc totum universum dignatus fuerit producere, ergo Deus non necessitatur ad hoc universum, siue ad optimum producendum. Probat<sup>ur</sup> 4. quia in Deo, neque ratione obiecti materialis, ut vidim<sup>us</sup>, neque ratione obiecti, vel motivi formalis datur necessitas; motivum enim formale in Deo, quoad velle & nolle est infinitas, quam utique habet sine creaturarum productione, quæ respectu Dei sunt obiectum materiale, quia creaturas non vult propter creaturas, vel perfectionem illarum, sed vult creaturas ob suam infinitam bonitatem: ergo Deus non necessitatur ad optimum producendum.

Obijcies 1. Deus per suam essentiam est perfectissimus artifex, & communicativus sui: ergo per essentiam, siue necessario debet aliquid producere. Respondeo, distinguo antecedens: Deus per essentiam est artifex perfectissimus & communicativus sui, in actu



actu primo, concedo; in actu secundo, nego antecedens & consequentiam.

Obijcies 2. Deus iudicat, productionem optimi esse meliorem, & magis conducere ad suam gloriam, quam illius negationem: ergo Deus non potest illam intermittere. Respondeo, licet Deus iudicet, productionem optimi meliorem esse, quam negationem illius, non tamen iudicat sibi meliorem; quia, ut dixi, bonitas creata non habet aestimabilitatem respectu boni infiniti.

Ob. 3. actus divini sunt essentialiter optimi: ergo tendunt in bonum optimum; sed melius est rem produci, quam non produci: ergo actus divini essentialiter tendunt in productionem optimi. Respondeo, distinguo antecedens, actus divini sunt essentialiter optimi in se, & quoad obiectum formale, nempe quoad infinitam bonitatem, concedo, actus divini sunt essentialiter optimi ex obiecto materiali, vel terminativo, sive à rebus creatis, quarum productionem Deus potest velle aut nolle, nego antecedens & consequentiam.

Ob. 4. Deus semper, & necessariò est summè laudabilis: sed si nihil produxit, non est summè laudabilis, quia nemo existit, qui ipsum possit laudare, ergo Deus debet aliquid producere. Respondeo, distinguo



Stinguo antecedens : Deus necessario est  
summè laudabilis laudabilitate extrinsecâ  
sive gratitudinis, hoc est, de essentia Dei est,  
ut creaturæ Deum laudent, illique gratias  
agant. nego antecedens, Deus necessario est  
summè laudabilis laudabilitate intrinsecâ,  
hoc est, Deus, quia est infinitè perfectus, me-  
retur omnem & infinitam laudem, quam  
habet perfectissimè à seipso, concedo  
antecedens, & nego con-  
sequentiam.

*Omnia ad maiorem Dei gloriam.*







## I N D E X.

### DE CAUSA IN COM. MUNI.

- §. 1. Quid, & quotuplex sit causa in com-  
muni? pag 1.
- §. 2. Quid sit virtus causa, & an causa in  
a et u primo constituatur per possibi-  
litem actionis? 4
- §. 3. De existentia & causalitate cause. 7
- §. 4. De discrimine inter causam physi-  
cam & moralem; inter moralem  
& conditionem. 10
- §. 5. Quid, & quotuplex sit prioritas, &  
qualis ad causandū requiratur? 12
- §. 6. Quid sit prius naturā, & an aliquid  
tempore posterius possit esse prius  
naturā? 15
- §. 7. An aliquid possit seipsum producere,  
& an detur mutua prioritas na-  
tura? 19
- §. 8. An detur, vel dari possit duplex actio,  
vel



## INDEX.

*vel causa totalis, respectu eiusdem  
effectus?* 22

## DE CAUSIS INTRIN- SECIS.

- §. 1. *Quid sit causa intrinseca, quæ virtus  
& causalitas illius?* 26
- §. 2. *Quid, & quoruplex sit causa mate-  
rialis, & an detur?* 29
- §. 3. *De causalitate cause materialis ex-  
trinsicæ, & an actio eductiva &  
passio realiter distinguantur?* 33
- §. 4. *De causa formali, & causalitate  
illius?* 36
- §. 5. *An, & quomodo introductio forme  
novæ sit prior compositio, & formæ  
expulsæ.* 38

## DE CAUSA FINALI, ET EXEMPLARI.

- §. 1. *Quid, & quoruplex sit finis?* 42
- §. 2. *An finis sit vera causa, & quæ sit vir-  
tus illius?* 45
- §. 3. *An cognitio sit, vel possit esse virtus  
cause finalis?* 48 §. 40



## INDEX.

- §. 4. De effectu cause finalis, & causalitate illius. 52
- §. 5. Quibus entibus agere competat propter finem? 54
- §. 6. Quid, & quotuplex sit causa exemplaris, quæ virtus, & causalitas illius? 57

## DE CAUSA EFFICIENTE, IN COMMUNI ET CREATA.

- §. 1. Quid sit causa efficiens, quid principalis & instrumentalis? 59
- §. 2. Quid sit virtus, & causalitas cause efficientis? 63
- §. 3. An detur causa efficiens creata, & an substantiæ sint operativa? 65
- §. 4. Quid accidens producere possit, & an substantiam? 68
- §. 5. An causa creata habeat spheram activitatis, & an detur actio in distans? 73



# INDEX.

## DE CAUSA EFFICIENTE INCREATA.

- §. 1. *An causa prima, sive Deus naturali-  
ter possit demonstrari?* 78
- §. 2. *An, & quomodo Deus immediate  
concurrat ad omnes effectus?* 84
- §. 3. *An omnes creature conserventur à  
Deo, & an elevari possint ad quid-  
vis producendum, vel creandū?* 88
- §. 4. *An Deus causas secundas physicè præ-  
determinet ad operandum?* 92
- §. 5. *Per quale decretum, Dei applicetur  
omnipotentia ad effectus producen-  
dos?* 98
- §. 6. *An detur series effectuum, & an De-  
us determinet ad individuū actus?* 104
- §. 7. *An Deus physicè influat in actum  
peccaminosum, & an sit causa pec-  
cati?* 108
- §. 8. *An Deus, sive causa prima necessite-  
tur ad optimum faciendum?* 112



## ERRATA.

Pag. 1. lin. 8. lege priora. p. 2. l. 24. efficiens.  
p. 3. l. 23. necessariam. p. 7. l. 3. pro quod lege  
quoad, & l. 11. possibilitas. p. 32. l. 4. creanda.  
p. 35. l. 13. unione. p. 40. l. 11. ergo. p. 49. l. 3. re-  
presentatio boni. p. 66. l. 18. lege, ut causa  
univoca, vel eminenter, ut æquivoca,







## ERRATA:

Pag. 1. lin. 8. lege priora. p. 2. l. 24. efficiens.  
p. 3. l. 23. necessariam. p. 7. l. 3. pro quod lege  
quoad, & l. 11. possibilitas. p. 32. l. 4. creanda.  
p. 35. l. 13. unione. p. 40. l. 11. ergo. p. 49. l. 3. re-  
præsentatio boni. p. 66. l. 18. lege, ut causa  
univoca, vel eminenter, ut æquivoca,



Feurstain, Andreas

Philosophia de causis in communi et in specie

Friburgum Brisgoiae [1675]

Diss. 1113#Beibd.4

urn:nbn:de:bvb:12-bsb10843674-1